

KUBASIKA NA NGAANDA YA CAMP



Beto bikana kaka ya kutelama mwa ntangu fyoti.

Nzambi ya luzolo, beto ke vutula matondo na Nge samu na bweso yankaka yayi na kutelama na yinzo ya Nzambi mpe kusambila Nzambi ya moyo. Beto ke vutula matondo mingi ti beto ke kuzwa dyaka bweso yayi na yinsi. Mpe ntangu yayi beto ke vutula matondo samu na bantu yayi ya kukwikama, mpe, Mfumu, yina me luta ba-kilometre mingi, bankama ya bakilometele, mingi ya bawu. Mpe bayankaka na kati ya bawu ke meka na ku—kuvutuka na ngolo nionso, na nkokila yayi, kuna na bala-bala ya nene, na lweka ya bala-bala ya nene. Nzambi, mu ke sambila ti Nge ke vwanda na bawu mpe ke sadisa bawu. Twadisa bawu, O Tata. Beto ke tonda Nge samu na mwa mvula yayi ya fioti yina me nata mupepe ya madidi samu na beto, na mwa ntangu fioti.

² Mpe, Tata, beto ke sambila ti Nge ke kutana na beto na nkokila yayi na Ndinga ya Nge. Samu ti, ya kele samu na yina beto me vukana, Mfumu, ya kele kukutana na Nge na kati ya Ndinga. Sadisa beto, Mfumu, ti kuvukana ya beto ke vwanda na ndandu mingi samu na Kimfumu ya Nge, mpe ti beto fwana kuzwa lusalusu ya kulutila mingi, ti beto lendaka sadisa bayankaka. Pesa bima yayi beto me lomba, na Nkumbu ya Yesu. Amen.

Beno lenda vwanda.

³ Mu vwandaka kaka na mwa masolo ya kingenga kuna. Mpe kaka na ntwala lukutakanu kubanda, Billy pesaka munu kinkuku ya mutindu yina tii kuna mu—mu zaba na mpasi wapi nzila ya kubanda. Kasi beto ke sambila ti—ti Nzambi ke sakumuna nge samu na ngolo ya nge ya kubikana na lukutakanu ya nkokila.

⁴ Ntangu yayi, kana Nzambi kuzola, Lumingu ke kwisa na suka mu ke vwanda diaka na lukutakanu. Mu zonzaka kaka na pasteur, mpe ya kele nyonso ya kulunga na bawu.

⁵ Mpe ntangu yayi mu ke zola kuzwa ntangu ya kuzaba bankundi nyonso ya mbote yina mu kele na yawu awa, kasi mu zaba ti beno ke na kuingila. Mwini kele ngolo. Mpe mu—mu ke bika kaka ntangu yina, mpe—mpe mu ke tuba kaka yayi, “Nzambi sakumuna nge.”

⁶ Beno zaba, mu zaba ve kima ya kulutila nene yina muntu nionso lendaka lomba samu na munu ti, kulutila na kutuba,

“Nzambi sakumuna nge.” Beno me mona? Kana Yandi ke sala yawu, yawu yina kaka mu ke na yawu nsatu, kaka—kaka mutindu yina. Mu banza ti ya kele ndinga ya kulutila nene na—na kati ya nzonzolo, “Nzambi sakumuna nge.” Mpe, ntangu yayi, mpe mu zaba ti Yandi ke sala yawu.

⁷ Mpe mutindu mu tubaka na kento ya munu na mwa ntangu fioti me luta. Mu vwandaka—mu vwandaka meka na kusukula masa, mpe mu lendaka ve kuyuma. Mu—mu vwandaka kusuna mutoki, mpe na manima mu vwandaka diaka ya kupola na masa. Mu vwandaka kusuna mutoki, mpe mu lendaka diaka ve kulwata simisi ya munu, diaka. Mpe ya kele mwa luswaswanu kuna na Tucson. Ya kele ndungutila pene ya bambala zole kulutila awa, kasi na manima beno—beno ke kuzwa ndungutila ve. Ya kele ve—ya kele ve na madidi na kati ya mupepe, na yawu ya ke yumisa yawu kaka na ntangu beno ke basika kuna. Beno ke tula basini ya masa kuna, mpe ya kele diaka ve. Beno lenda ve kutoka, mpamba ve ti ya ke katula kaka yawu na beno ntete beno lenda—beno—beno lenda kutoka. Beno ke toka, mbote mingi, kasi beno ke mona yawu ata mbala mosi ve. Na yawu, awa, mu vwanda meka na kuzwa ntangu mosi ya mpasi samu na kuyuma. Na yawu, mpe mu—mu ke na kupolaka na masa kaka na ntangu yayi.

⁸ Beto vwandaka kuna na kivinga, mpe beto kuzwaka bantu sambwadi to nana na kati, yina vwandaka mambu ya nswalu—nswalu, mpe yina zolaka vwanda ya kumona na mbala mosi.

⁹ Ntangu yayi, ya kele samu na yina mu ke kukanga beno, mpe kulomba beno na—na kukwiza, ya kele samu ti mu—mu ke kuwa ti ya kele—ya kele mfunu mingi samu na beto. Mu—mu ke sala yawu ve, bankundi. Mu—mu ke banza mingi na beno, samu na kusala yawu, kaka na kukwiza na—na kuwa muntu, to kuwa yina mu fwana tuba, to kima mosi. Mu—mu ke sala yawu ve. Ya ke vwanda mbote ve. Ya ke lakisa ve luzolo ya munu na beno, kaka na kukwiza mutindu yina. Mpe mu ke kwikila ve ti nge ke kwisa . . . Ata ti, mu zaba ti nge zola munu, mutindu mu zola nge. Mpe—mpe na yawu mu—mu—mu zaba yawu, to beno ke sala ve bima yina beno ke salaka. Na yawu mu banza mingi na beno, ti mu zolaka ve ti beno vwanda na ndungutila ya ngolo mpe nyonso, mutindu yayi, kana mu banzaka ve ti ya vwandaka kima mosi samu na kusadisa beno.

¹⁰ Mpe dyaka, ntete mu kwiza awa, mu ke mekaka ntangu nyonso na mutindu ya munu ya kulutila mbote, na ntwala ya Nzambi, samu na kubaka mwa kima mosi, Masonuku ya mutindu mosi, mpe kulomba lutwadusu ya Yandi, kima ya nsuka na ntwala ya kukatuka. “Sadisa, Mfumu Nzambi, na mutindu nyonso, pesa—pesa nyonso Nge lenda na bantu ya luzolo.”

Mpe mu ke vingila, mpe mu ke kwikila, ti mu ke zinga ntangu nyonso na nge. Mu ke kwikila ti yayi kele ntangu ya kulutila nkufi yina kele na beto, na yina beto me telama kintwadi

mutindu yayi. Beto ke vwanda kintwadi na Seko. Benome mona? Mu ke sala yawu. Mu—mu—mu ke kwikila yawu.

Mpe mu zola kusadisa beno. Mpe munu, kana mu tuba kima ya yimbi, tata ya Mazulu zaba ti ya kele ve samu ti mu kele na dibanza ya kusala yawu; ya kele samu ti mu zaba yawu ve; mu ke zaba dyambu ve na kusalaka yawu.

¹¹ Na yina, na kuzabaka ti beno kele kizitu ya munu, mpe na maboko ya munu, samu na Nsangu ya mbote, mu ke zola ntangu nionso kubumba beno kaka na kati ya ba-page ya Biblia yayi. Mpe—mpe mu . . .

Bambala mingi bantu me kwizaka na munu, mpe tubaka, “Mpangi Branham, kana beno lenda basika kaka awa mpe kutuba ‘MUTINDU ME TUBA MFUMU’ na mwana ya munu ya fyoti yina kele ya kubela, ya ke vwanda mbote. Kwenda kuna mpe tuba kaka, ‘Ya ke beluka.’ Yawu yina kaka mu zola ti nge sala.”

¹² Ntangu yayi, yina kele ya kukwikama mpe ya luzolo. Mutindu mu ke sepela na yawu! Kasi, beno zaba, mu lenda sala yawu ve tii kuna Yandi ke tuba na munu, ntete. Benome mona? Mu lenda sambila samu na mwana, kusala nionso yina mu lenda sala.

Kasi, benome mona, yinki kana mu kwendaka kuna na yisi ya kuzatuka mpe tubaka yawu? Benome mona, kana mu tubaka, “MUTINDU ME TUBA MFUMU,” ya kieleka ya ke vwanda kaka mutindu me tuba kuzatuka ya munu. Benome mona? Benome mona? Mpe kuna ya lendaka salama, mpe ya lendaka salama ve. Kasi, na yina, yinki kana muntu mosi yina kele na yisi ya kuzatuka ya munu, mpe ya salamaka ve? Na yina, muntu yina lendaka vwanda na dyambu bantangu yankaka na kati-kati ya luzingu mpe lufwa, na yina wapi kisika ba ke tula kivuvu ya bawu? Ba ke vwanda na boma ti mu lendaka vwanda na yisi ya kuzatuka dyaka. Benome mona?

Na yawu, ntangu mu ke tuba yawu, mu zola kuvwanda ya kundimama ti ya kele kieleka, na nyonso mu zaba. Mpe kuna ntangu Yandi ke zonga na munu, mu lenda tuba kaka yina Yandi lakisaka munu. Ya lenda vwanda ya kele mbote to yimbi, mu fwana kutuba yawu. Mpe bantangu yankaka ya kele—ya kele mbote ve na kutuba na bantu bima yina. Kasi, ntete, mu kele kaka ya kukangama na kutuba na bantu bima ya yimbi yina ke bula bawu, mutindu mu kele ya kukangama na kutuba na bawu bima ya mbote yina ke kanga bawu.

¹³ Mpe, na manima ya nyonso, beto zola luzolo ya Mfumu. Ntangu yankaka luzolo ya Mfumu kele ya kuswaswana na bansatu ya beto. Kasi, dyaka, kana beto zola luzolo ya Mfumu, ya kele kaka ntalu na kuzaba ti yimbi ke bula beto, kana ya kele luzolo ya Mfumu. Ya lenda vwanda ti ya kele mbote to yimbi, ya

kele luzolo ya Mfumu yina beto zola kusala. Mpe mu zaba ti beto ke tala yawu mutindu yina.

¹⁴ Ntangu yayi, mu—mu zaba ti bampangi awa ke vwandaka mbala mingi na baminuti makumi tatu, makumi zole na baminuti makumi tatu na Lumingu na nokila. Mpe mu—mu zaba ve kana mu lenda sala yawu to ve, na yina mu—mu ke sala kaka yina mu lenda sala.

¹⁵ Ntangu yayi, mu banza ti ya kele na lukutakanu ya mbotika mbala mosi na manima ya yayi. Mu kuwaka ti ba botikaka nkonga ya nene ya bantu na suka yayi. Ntangu nionso, ya kele na mbotika yina ke salama awa, ntangu nionso. Milongi, ba-Méthodiste, ba-Baptiste, ba-Presbytérien, dibuundu ya Nzambi, ba-Luthérien, nyonso yina ya lendaka vwanda, ke kwisa mpe ke baka mbotika na Nkumbu ya “Mfumu Yesu Klisto.”

Mpe na ntwala ya Nzambi, ntangu mu fwana telama na Kiti ya Lufundusu, mu fwana kupesa mvutu samu na yawu. Mpe kana mu vwandaka kaka pwelele na mabanza ya munu, na kuvwandaka ya kunungisa na nyonso na luzingu ya munu mutindu mu kele ya yawu, Mu ke kubama samu na Enlevement na ntangu yayi, samu mu zaba ti ya kele Kieleka ya Nsangu ya mbote. Beno me mona? Ya kele Kieleka.

¹⁶ Ya kele ve na Masonuku mosi na kati ya Biblia kisika muntu kubotamaka ntete na mutindu yankaka kasi na Nkumbu ya Yesu Klisto. Lutumu ya “Tata, Mwana, mpe Mpeve-Santu,” kele kaka . . . “Na yawu beno kwenda, longa bayinsi nyonso, na kubotikaka bawu na Nkumbu ya Tata, Mwana, Mpeve-Santu.” Ve na . . . ba ke bokila ve nkumbu yayi na zulu ya bawu; kasi botika bawu na *Nkumbu* ya Tata, Mwana, Mpeve-Santu, yina kele “Mfumu Yesu Klisto.”

¹⁷ Muntu nyonso yina na kati ya Biblia kubotamaka na Nkumbu ya Yesu Klisto. Mpe Biblia ke tuba, ti, “Muntu nyonso yina ke katula Ndinga mosi na Yawu, to kubwela ndinga mosi na Yawu, na mutindu nyonso, kyadi na bawu.” Na yawu mu fwana vwanda na boma mingi, na nganda ya kubwela kima mosi to kukatula Yawu na Masonuku.

Ya ke kotisaka munu na kati ya mpasi bambala mingi, kasi mu ke vwandaka kaka kuna. Yandi kele kinwaninu ya munu. Ya me sala ti mu kabwana na bankundi mingi. Ba me kabula munu samu na yawu. Kasi kaka na ntangu mu ke bumba Nkundi yayi awa, Mfumu Yesu! Mpe Yandi kele Ndinga. Ya lenda vwanda ti, nzila ya ngolo kuvwanda, nzila kele mpasi, Yandi kwizaka mutindu mosi. “Mpe kana bawu bokila Mfumu ya yinzo ‘Béelzébul,’ wapi mutindu ya kulutula bawu ke bokila bayina ya bilandi ya Yandi?”

¹⁸ Ntangu yayi Mfumu kuvwanda na beno nionso mpe sakumuna beno na kati ya sabala, mpe pesa nge ya kulutula

mbote yina mu lenda sambila samu na Nzambi na kupesa nge, ya kele kisambu ya munu.

Ntangu yayi beto ke tanga na Ndinga ya ntalu.

¹⁹ Mpe—mpe ntangu yayi beno bambuka moyo, diaka, na Kilumbu ya tatu na nkokila. . . Ya ke na lukutakanu ya kati-kati ya sabala mosi to kima mosi? [Mpangi Neville me tuba, “Kilumbu ya zole, lukutakanu ya bisambu, Kilumbu ya ntete mpe Kilumbu ya zole na nkokila.”—Mu.] Kilumbu ya ntete mpe Kilumbu ya zole na nkokila kele balukutakanu ya bisambu. Mu banza ti bantu zaba.

²⁰ Mpangi Junior Jackson, yandi kele na kati ya kivinga? Mu. . . Mpangi Jackson, mu ve. . . [Mpangi Neville me tuba, “Yinga, kaka awa.”—Mu.] Yandi kele awa, Mpangi Jackson. Mbote mingi. Mu—mu. . . Mpangi Jackson awa, mu. . .

Mpe Mpangi Don Ruddell, yandi kele na kati ya kivinga na nkokila yayi? Mpangi Don, awa.

Mpe mingi ya bampangi yankaka, mu ke mona bampangi awa yina me katuka na Arkansas, mpe Louisiane, mpe—mpe bisika yankaka pene-pene ya yinsi.

²¹ Mpe mu kele na mwa, bampangi ya kukula awa na nkokila yayi, mpe. Mu ke na Mpangi Thomas Kidd yina me vwanda awa na diboko ya kibakala, yandi ke vwanda na bamvula makumi nana na yiya na mwa bilumbu fioti. Mpe pene ya bamvula tatu to yiya me luta, ba salaka yandi lipaso ya prostate, mpe yandi vwanda kufwa na cancer. Dokotolo vutulaka yandi kaka samu na kufwa. Mpe mu zolaka bebisa ditoma ya munu ya ntama, na kukwendaka na yandi, kuna na Ohio. Mpe Mfumu Yesu belusaka yandi mpe mbote. Mpe awa, yandi mpe mwa nkundi ya yandi, na nkokila yayi. Mpe mingi ya beno zaba bawu; mu banza ti bayankaka ve. Kasi awa kele bakala mpe kento yina vwandaka longi Nsangu ya mbote ntete mu butuka. Beno banza na yawu, mpe mu kele kiboba ya bakala. Beno me mona? Ntangu yayi, mpe mu ke tala bawu, mpe bawu ke kwenda kaka, na yina mu ke baka kikesa.

Beto nyonso zaba Mpangi Bill Dauch yina kele ya kuvwanda awa na nsongi.

²² Mpe, oh, wapi mutindu beto ke vutula matondo samu na masakumunu nionso ya nene ya Nzambi! Bika yawu kulandila na kuvwanda na beto tii kuna mpungi yina ya nsuka ke bula mpe, beno zaba, “Beto ke zanguka kintwadi, samu na kukutana na Mfumu na mipepe.” Beno banza na yawu! Bantu ke kondwa, ba lenda mona beno diaka ve, kasi beno ke vukana kintwadi na kimvuka yankaka.

“Bawu yina ke vwanda ya moyo mpe ke bikana kaka na Nkwizulu ya Mfumu ke pekisa ve, to ke kanga nzila ve,” ndinga kele, “bayina kele ya kulala,” ya kufwa ve. Ve, Baklisto ke

kufwaka ve. Ba ke bakaka kaka mwa kupema, beno me mona. Kaka yina. Oh, la la! “Mpe mpungi ya Nzambi ke wakana; mpe bantu ya kufwa na Klisto ke vumbuka ntete,” ke monika na bantu mingi. Mpe na mbala mosi, beno ke telama mpe ke tala, mpe, mbote, ya kele na mpangi-bakala, mpe beno zaba ti ya kele ntangu ya yinda ve. Na mwa ntangu fioti, “Beto ke soba, na mwa ntangu fioti, na mbwetolo ya disu. Mpe kintwadi na bawu, ke kondwa na zulu ya ntoto, ke zanguka samu na kukutana na Mfumu na mipepe.”

²³ Mpe, kubanza, na nyonso yina beto me mona na kati ya Masonuku, mpe bansiamisa ya kieleka ya ngunga yina beto ke na kuzingila, ya lendaka salama na ntwala lukutakanu kumanisa, beno banza kaka na yawu, na nkokila yayi.

Na yina, na nzila ya yina, beto ke belama na Ndinga ya Yandi, na yina beto ke baka Hébreux kapu ya 13, mpe beto ke tanga kubanda na nzila ya 10 tii na nzila ya 14. Ya Hébreux 10 mpe . . . to, to beno lemvokila munu. Hébreux 13:10 tii 14.

²⁴ Ntangu yayi, mutindu mu tubaka, beto, ntangu beto ke sila kukwikama na drapeau ya beto, yina kele mbote, munu . . . Beto ke telemaka ntangu beto ke pesaka luzitu. Mpe mambu yankaka nionso ya nene, beto—beto ke telemaka na luzitu, to na kupesa mbote, mpe nionso yina, na yinsi ya beto. Mpe ntangu ba ke yimbaka *The Star-Spangled Banner*; beto ke telemaka na bukebi.

²⁵ Mpe mutindu basoda ya Baklisto, beto telama na bukebi na yina beto ke tanga Ndinga ya Nzambi. Beno kuwa mbote ntangulu ya Ndinga. Ya kele samu na yina mu zola kutanga Yawu; bandinga ya munu lendaka kubwa, kasi luzolo ya Yandi ve. Na yawu kana mu tanga Ndinga ya Yandi, kaka, beno ke vwanda ya kusakumuka. nzila ya 10 ya kapu 13 ya Hébreux.

Beto kele na autel, kisika bayina ke salaka kisalu na tabernacle kele ve na muswa ya kudia.

Samu ti banzutu ya bibulu yina, yina menga me kota na sanctuaire na nzila ya nganga-Nzambi ya mbuta samu na disumu, ba ke yokaka yawu na ngaanda ya camp.

Na yina Yesu mpe, ti yandi fwana santisa bantu na menga ya yandi mosi, talaka mpasi na ngaanda ya mwelo.

Bika beto basika mpe beto kwenda na yandi na ngaanda ya camp, na kulwataka nsoni ya yandi.

Samu awa beto kele ve na mbanza yina ya mvula na mvula, kasi beto ke sosa mosi ke na kukwisa.

²⁶ Mfumu Nzambi, Yina kele na kizitu ya Ndinga yayi, mpe kizitu ya kukeba Yawu na kati ya bansungi, kumona ti Yawu me kwisa na beto ya kukondwa mvindu. Yawu kele ya kuvedila,

Ndinga ya Nzambi ya mwense. Beto ke zolaka mingi Yawu na kati ya bantima ya beto na mwa ntangu yayi. Buka bisono yayi, Mfumu, na dibanza samu na beto, na nkokila yayi; ti beto, bana ya muntu, lendaka bakula muswa ya Nzambi. Samu beto me lomba yawu na Nkumbu ya Yesu. Amen.

²⁷ Diloni ya munu samu na nkokila yayi kele: *Kubasika Na Ngaada Ya Camp*. Ya kele mwa dilongi mosi, ya mwa ngitukulu, kasi, beno zaba, ntangu nyonso beto ke talaka Nzambi na bima ya ngitukulu. Yinza me kangama mingi na kati ya bikalulu ya yandi, ti, nionso yina ke basikaka na ngaanda ya kubendana ya mumesanu, ke kumaka ya ngitukulu.

Mutindu mu longaka awa mwa bilumbu me luta, awa na tabernacle, na zulu ya: *Ndeke ya ngitukulu*. Mpe kisadi-bilanga kele ndeke ya ngitukulu samu na muntu ya mumbungu; muntu ya mumbungu kele ndeke ya ngitukulu samu na kisadi bilanga. Muklisto kele ndeke ya ngitukulu samu na mi- . . . mumpani, mpe nionso yina. Beno fwana vwanda kilawu ya muntu mosi. Na yawu, kima nyonso ya mumesanu ve, ya ke sala beno mutindu kilawu, na mutindu ya ntangu nyonso.

²⁸ Mpe na yina, bantu ya Nzambi, mpe baprofete ya Yandi, mpe minati-nsangu ya Yandi—ya Yandi na nzila ya nsungi, yina nataka Nsangu ya Yandi kukatuka na Ndinga, ba talaka bawu mutindu bilawu, na ngaanda.

²⁹ Noé vwandaka kilawu, na yinza ya yandi ya nene ya mayele yina yandi longaka. Noé. . . Vwandaka kieleka kilawu, na Pharaon; na makulu ya yandi na zulu ya kiti ya kimfumu mpe na manima kubika yawu, samu na nkonga ya bantu ya bisalu ya kubalula poto-poto, mutindu bawu banzaka. Mpe Yesu vwandaka kilawu, samu na bantu. Mpe bayankaka nyonso yina salaka mpe zingaka samu na Nzambi, ba talaka bawu mutindu bilawu. Ba fwana basika na ngaanda ya camp yina ba vwandaka na yawu.

³⁰ Kulutula mpe kulutula mingi, mu ke na muswa ya kukwikila ti bantu ke kumaka ve tii na Klisto.

Ntangu yayi, mu kele awa samu na kumeka na kusadisa na mutindu nyonso yina mu lenda, mpe kusala nsamunu ya munu pwelele mutindu mu zaba mutindu ya kusala yawu. Mpe beno ke tala mpasi na munu kana beno zola.

³¹ Mutindu mu ke tala mpe ke longa bisika nionso na yinsi, mpe mu ke tala bantu, Mu—mu me ndimisama na muvimba ti bantu ke na kukuma ve na Klisto. Mpe mu ke kwikila ti ya kele mbeni yina me losa kikaku yayi. Samu ti, ya kele samu na yina mu ke kwikilaka yayi, Yandi kele ve kima yina ba talisaka na bawu. Ba me twadisaka bawu na dogme, to na dilongi mosi, to na parti mosi, to na nzingulu mosi, to na sensation mosi, to na kima mutindu yina, na kisika ya kutwadisa bawu na Klisto, Ndinga.

Ya kele samu na yina mu banza ti bantu ke na kupemisaka kisika ya bawu ya Seko na zulu ya dogme mosi, to sensation mosi. Mutindu, bayankaka ke tuba, “Mu binaka na Kimpeve. Mu—mu zonzaka na bandinga. Mu—mu—mu kuwaka tiya kutambula na zulu ya munu.” Mpe beno zaba, diabulu lendaka mekula bima yina nionso?

³² Ya kele kaka na kima mosi yina yandi lenda mekula ve, ya kele Ndinga. Na kati ya kuswana, kati-kati ya yandi na Yesu, konso ntangu Yesu nungaka yandi. “Ya kele ya kusonama,” Ndinga!

Mpe mu ke kwikila, bubu yayi, ti ya kele samu na yina bantu ke kwizaka ve na Klisto, ya kele samu ti bawu kele ya kutwadisama, mingi ya bawu, na *dénomination*. “Beno kwisa kota na dibuundu ya beto.” To, “Beno tanga katekisima ya beto,” to, “Beno kwikila malongi ya beto,” to—to *systeme* mosi. Ba me twadisa bawu na nzila ya yimbi. Mpe bisalu ya bawu mpe luzingu yina bawu ke zinga kukondwa Klisto, ke talisa na kati ya luzingu ya bawu mosi, me siamisama na kima yina ya kieleka.

³³ Mumbandu. Mu zola ve kunyongisa bansatu ya muntu mosi. Kasi, na manima mpe na ntwala, na kati ya yinsi, mu me fundisa bakento na bansuki ya nkufi. Ya kele Biblia. Mu me fundisaka bakento yina ke lwataka bakupe, bayina ke tulaka maquillage. Mpe konso mvula ya ke kumaka yimbi mingi. Ya ke lakisa ti ya kele na musapi yankaka, kisika mosi kuna, yina ke lakisa bawu mutindu yankaka. Mpe bawu ke na kukumaka ve na Klisto.

³⁴ Mpe bawu ke tuba, “Beto kele mambele ya dibuundu. Dibundu ya beto ve. . .” Ya ke sala luswaswanu ve na yina dibuundu ya beno ke kwikilaka.

Nzambi tubaka, “Ya kele luvunu.” Mpe kana ba salaka na kukuma tii na Klisto, ba ke sukisa yawu. Mpe, kaka yina ve, kasi muntu ke baka kisika ya yandi kana yandi me kukuma na Klisto, mpe ke telemina yawu ve. Babakala zolaka ve kubika bakento ya bawu kusala mutindu yina. Bakala ya kieleka zola ve ti kento ya yandi kusala mutindu yina.

³⁵ Ntwenya mosi ya bakala awa na mbanza, kilumbu yankaka yina, zolaka kufwa bantwenya zole ya babakala. Ba vwandaka na station. Beno bantu ya Jeffersonville monaka yawu na zulunale. Mpe mwana-kento yayi ya ntwenia vwandaka kota na station, na kima mosi ve, na mpasi, na mutindu nionso, mpe babakala zole ya bantwenia vwandaka kuna salaka nsamunu mosi. Mpe pompiste zolaka kufwa bana zole ya babakala; mpe ba kangaka yandi samu na yawu, mpe tulaka yandi na yinzo ya lufundusu. Mpe zuzi yufulaka yandi, “Samu na yinki nge. . . yandi lwataka mutindu yayi?”

Yandi tubaka, “Mu banza ti yandi ke talana kitoko.”

³⁶ Ntangu yayi, ya kele na kima mosi ke tambula mbote ve na muntu yina. Mu ke kipe ve nani yandi kele. . . Kana yandi

kele musumuki, ya kele na kima ke tambula mbote ve na yandi. Zola ya yandi na kento yina lendaka vwanda ya kieleka ve, mpe kubasisa yandi samu na pambu ya yimbwa mutindu yina. Ya kele na kima mosi ke tambula mbote ve. Muntu me kwisaka ntete na dibulu ya kieleka yina ba lendaka fundisa na kati-kati ya yina kele mbote mpe yimbi?

³⁷ Beno me mona ba-maillot ya kuyobila maza ya malu-malu yina ba nataka? Beno zaba luzabusu ya munu ya mantwala ti na nsuka bakento lwata matiti ya fiki, bamvula makumi tatu na tatu me luta? Mpe ntangu yayi ba kele na yawu yina kele ya kulwata makasa ya fike, ba-jupe ya ke talisa nzutu. Ndinga ya Mfumu ke kondwaka ata mbala mosi ve. Beno me mona? Mpe yina zolaka salama kaka na ntwala ya ntangu ya nsuka, kukuma na dikasa ya fike dyaka. Mu vwandaka tanga yawu na magazine *Life*. Ba tubaka bamvula makumi tatu na tatu me luta, na ntwala bakento kubwa ya bawu. Ba tubaka yawu mutindu bawu ke sala yawu na kilumbu yayi, mpe bawu yayi. Wapi mutindu ba ke lwata bilele mutindu babakala, mpe wapi mutindu ba ke sala yawu, kukondwa bumuntu ya kento ke kubwa na yinsi yayi.

³⁸ Ya kele yisi mingi ya bayinsi nyonso yina kele na yinza, ya kele Amerika yayi. Yandi kele kima ya kulutila mvindu na nkonga. Yina kele landila kufiongonina ya bantalu. Makwela mpe kufwa makwela kele mingi na yinsi yayi kulutila kisika yankaka na yinza, mpe bayinsi yankaka ke baka mbandu. Beto vwandaka baka mbandu ya France, busafu mpe mvindu ya yinsi yina, mpe ntangu bawu ke na kubakaka mbandu ya mvwatulu na beto. Beto lutaka bandilu ya bawu.

³⁹ Mu zaba ti ya kele na kikuma mosi yina bantu ke na kukumaka ve na Klisto. Kana bawu zola, bawu zolaka sala mutindu yina ve.

Yesu talaka mpasi na ngaanda ya myelo, ti Yandi zolaka santisa bantu ya Yandi na Menga ya Yandi Mosi. *Kusantisama*, me katuka na mpova ya Grec, ya bampova zole ya kuvukisa, yina zola kutuba, “ya kusukula, mpe ba me tula na lweka samu na kisalu.” Mpe ntangu Nzambi ke sukula bantu ya Yandi na Menga ya Yesu, Yandi ke sukula bawu na busafu ya yinza mpe ke tula bawu na lweka samu na kisalu.

Na yina Yesu mpe, ti yandi fwana santisa bantu na menga ya yandi mosi, talaka mpasi na ngaanda ya mwelo.

⁴⁰ Ata mpe na bantu ya Nsangu ya mbote ya Muvimba, me vutuka mbala mosi na dibulu yina bawu basikaka. Yinki vwandaka dibuundu ya Pantekote, bamvula makumi yiya to makumi tanu me luta? Bawu singaka, mpe fundisaka, mpe sekaka mabuundu yina bawu basikaka, ba-denomination yina. Yinki bawu salaka? “Kaka mutindu yimbwa na biluki ya yandi, mpe ngulu na poto-poto ya yandi.” Bawu me vutuka na kisika

mosi yina bawu basisaka bawu, mpe ntangu yayi mabuundu ya bawu kele kaka mvindu mutindu bayankaka ya bawu.

⁴¹ Ya vwandaka kima mosi, mutindu mu tubaka na suka yayi. Mutindu, bantu kele mutindu Pierre tubaka, na Santu—Santu Matthieu 17:4 na 8, kisika yandi tubaka, “Ya kele mbote na kuvwanda awa. Beto tunga ba-tabernacle tatu.”

⁴² Kasi Mpeve ke zabisa ve bawu ve na kusala yawu. Yandi tubaka, “Yayi kele Mwana ya Munu ya luzolo; beno kuwa Yandi,” mpe Yandi kele Ndinga. Ya kele Yina beto ke tala, Ndinga, kyese ya beto ve to kima yankaka. “Yandi kele Ndinga ya Munu; beno kuwa Yandi!” Mpe yinki bawu monaka na manima Ndinga yayi tubaka na bawu? Ata mpe Moise na Elie vwandaka ve awa; to dyaka ya vwandaka na credo; to dyaka ti ya vwandaka na kima mosi me bikana kasi Yesu kaka, mpe Yandi kele Ndinga. Yina nyonso bawu monaka.

Ntangu yayi, “Kubasika na ngaanda ya camp.”

⁴³ Beto ke mona ti na camp ya bawu kisika ntangu yayi ya nene salamaka, kuna na Mongo ya Nsobolo, mutindu Pierre na ntwala bokilaka yawu, “mongo ya santu,” kisika Yandi kutanaka na bawu. Ntangu yayi, mu ke kwikila ve ti ntumwa zolaka kutuba ti mongo vwandaka santu; yandi zolaka tuba ti ya vwandaka Nzambi ya santu na zulu ya mongo.

Ya kele ve dibuundu ya santu; ya kele ve bantu ya santu. Ya kele Mpeve-Santu na kati ya bantu. Mpeve-Santu kele santu. Yandi kele Ntwadisi ya beno mpe Ntwadisi ya beno.

⁴⁴ Mpe beto ke mona, na mwa camp yayi kuna na zulu ya mongo, ya Nsobolo, ntangu ba tumaka bawu na kuwa, kima kaka ba tumaka bawu na kusala vwandaka kuwa Ndinga. Kima kaka bawu monaka, vwandaka credo ve. Ata mbala mosi ve ti bawu monaka kima yankaka kasi Yesu, mpe Yandi kele Ndinga yina kumaka nsuni.

Wapi mutindu ya kele kitoko, na camp mosi yina vwandaka na disamba ya Eden. Ntangu Nzambi pesaka ngolo na Dibuundu ya Yandi na disamba ya Eden, bantu ya Yandi, bawu vwandaka na kibaka mosi samu na kubikana na manima; yina vwandaka Ndinga. Bawu vwandaka na kinwaninu mosi ya kisengo, kima mosi, samu Nzambi zabaka yina zolaka nunga diabulu, mpe yina kele Ndinga.

⁴⁵ Yesu salaka kima mutindu mosi. “Ya kele Ndinga; ya kele ya kusonama.” Mpe Satana mekaka na—na kupakula Yawu, yandi tangaka Yawu ve; pakulaka Yawu samu na Yandi. Mpe Yesu tubaka, “Mpe ya kele mpe ya kusonama.” Ntangu yayi, beto fwana vwanda na Ndinga yina!

⁴⁶ Mpe na kati ya mwa camp yayi yina bawu kuzwaka kuna, ya Pierre, Jacques, mpe Jean; mpe Yesu, Moise, mpe Elie. Mpe na camp ya bawu bawu monaka basoda ya Mazulu ya kivudi,

to Dikunzi ya Nsemo na dituti yayi yina sobaka Mfumu Yesu. Mpe ntangu ba kubamaka samu na kusala denomination, mosi samu na musiku, mpe mosi samu na baprofete, mpe nionso yina, Ndinga tubaka, “Yayi kele Mwana ya Munu ya luzolo; beno kuwa Yandi.” Na yina, yina ba tumaka bawu, vwandaka kaka kieleka mutindu ya vwandaka na Eden, “Beni bikana na Ndinga!” Yina kele camp ya Nzambi samu na bantu ya Yandi.

⁴⁷ Ya ke monana, bubu yayi, samu na kuvwanda kilumbu ya ntangu bantu ke na kubasika na camp. Na nionso, ba ke kwenda ntama.

⁴⁸ Beni zaba, ba tubaka na munu, na mwa ntangu fioti me luta, ti ba vwandaka na avion ya reaction ntangu yayi yina lendaka . . . ya ke sala bawu makelele ve beto ke kuwa awa, yina ke ningisa banela. Ya kele ntangu mpepo ke kimaka mbangu mingi ti ya ke lutaka muningu ya yawu mosi, yina ba ke bokilaka kibaka ya muningu. Mpe ntangu ya ke kwenda na zulu ya kibaka ya yawu mosi, ya kele pene-pene na yina ya ke sala.

Mpe mu banza, na kati kuna, ti beto ke kuzwa leso. Ntangu beto ke kwenda na zulu ya kibaka ya beto mosi, na kati ya Ndinga ya Nzambi, na yina ya kele yina kele na ndilu yina Nzambi lenda sala na muntu yina kele ya kukubama na kukwenda na zulu ya camp, na camp ya muntu, ya kele. Ntangu yayi, beto ke mona ti, kubasika na ngaanda ya camp, kubasika na ngaanda ya yayi.

⁴⁹ Mu ke mona Satana, mpe, ke nata bantu ya yandi na kubasika na ngaanda ya camp ya mabanza, na ngaanda ya camp ya—ya sense ya mbote. Satana ke baka bantu ya yandi mutindu yankaka, na ngaanda ya camp; Nzambi ke nata bantu ya Yandi na ngaanda, mutindu yayi yankaka. Mpe Satana nataka bawu na ngaanda ya camp ya bumuntu ya mbote. Ntangu ya ke kuma na kisika yina bantu . . . mpe lenda kutambula mpe kusala, mpe kukwenda na ntuala na bima yina ba ke na kusalaka bubu yayi na ndambu ya bumuntu. Ya kele na ngaanda ya mabanza ya munu na kumona ti bakala lenda bika kento ya yandi kubasika kuna, ya kulwata mutindu yina, mpe kubula mbata na muntu mosi samu ti ya me finga kento ya yandi. Ya kele na ngaanda ya sense ya mbote. Yandi fwana zaba mbote kulutula yina. Na zulu ya bumuntu ya mbote! Wapi kisika kele kisika ya kutelama?

⁵⁰ Mwa bakala mosi to kento mosi yina kele ya bamvula ya munu, mu lendaka yufula beno yayi. Yinki kana mama ya munu to mama ya beno, pene ya bamvula makumi tanu me luta, basikaka kuna na bala-bala na mosi ya bakupe yayi to babikini, ya me lwata, to nionso yina beno ke bokilaka yawu? Musiku zolaka lokota bawu, na mbala mosi, mpe kutula bawu na yinzo ya bilawu. Mama mosi bikaka yinzo kukondwa bilele ya yandi, mpe yandi lendaka vwanda na yinzo ya bilawu, samu ti na yintu ya kele na kima mosi ke tambula mbote ve. Mpe

kana ya vwandaka na manzaka ya kusala kima mutindu yina na ntangu yina, ya kieleka ya kele kidimbu ti kima mosi me kuma bilawu. Ya kele kaka kuzimbana ya mabanza, ya kele kubasika na ngaanda ya mabanza; ya kele mvindu!

⁵¹ Mpe ntangu muntu lenda kunwa makaya, mpe badokotolo talisaka na yandi ti mafunda ke kufwaka konso mvula samu na dyambu yango, mpe lendaka landila kaka na kubenda kinkuku ya makaya, ya ke monana mutindu ti ya kele na kima mosi ke tambula mbote ve na mabanza ya muntu yango.

Mpe ntangu muntu kele na shoke na yintu, mpe yandi kele ve...yandi lenda ve kuvwanda na mabanza ya yandi mosi kintwadi, yina yandi ke na kusalaka, yandi ke tala bureau ya konso dokotolo yina kele na yinsi, samu na kutala yina ke tambula mbote ve na yandi. Kasi na yina yandi ke bikana na nganda to na kati ya ditoma, mpe ke kunwa tii kuna yandi ke kuma ya muvimba kilawu; ke sadila mbongo ya yandi, samu na kukikotisa yandi mosi na kati ya yawu. Mpe kana yandi kumaka na kukota na kati ya yawu kukondwa ntokisila ya malafu ya ngolo, na yina yandi ke manisa konso centime yina yandi ke kuzwa, na kati ya bureau ya dokotolo, na kumekaka na kutala yina ke tambula mbote ve na yandi. Ya ke sala sense ve.

⁵² Kana faucon mosi ke pumbuka na zulu ya mbanza, mpe mu lendaka baka munduki ya munu, mpe kukwenda na manima ya lupangu ya munu mpe kubula faucon yayi, na baminuti kumi katuka kuna mu ke vwanda na boloko. Ba ke kanga munu, “Samu—samu na nkadulu ya kukolama; samu ti mu me sadila munduki ya tiya na kati ya mbanza; samu ti mu me tula baluzingu ya bantu na kigonsa, na munduki, na kubulaka munduki na zulu na faucon yango.” Mu lendaka kufwa muntu mosi, ba ke tuba. “Ba fwana katula yandi na kingenga.”

Mpe na manima ba ke tekisa mingi ya malafu ya ngolo na muntu mosi samu ti yandi lawuka malafu, mpe kukotisa yandi na ditoma yina lendaka kufwa dibuta ya muvimba ya kufuluka. Mpe ntangu ba ke kanga yandi, yandi ke pesa ba-dollar tanu mpe ntalu. Na kuvwandaka na mabanza ya yimbi na ntwala ya kufwaka bantu! Yinki kele dyambu na yinza? Kima mosi ke tambula mbote ve kisika mosi.

⁵³ Ntangu yayi, “kubasika na ngaanda ya camp,” na ngaanda ya bumuntu, na ngaanda ya mabanza.

Beno tala, bantu ya beto ya politiki bubu yayi ke tuba kima mosi ve samu na kutanga Biblia na lukolo. Bawu kele na boma. Bawu zaba ve wapi nzila mupepe ke bula. Bawu zaba ve kana bawu ke zimbisa voti, to ve. Beto ke na nsatu ya Abraham Lincoln yankaka. Beto ke na nsatu ya John Quincy Adam. Beto ke na nsatu ya muntu yina ke telama, ata mutindu mupepe ke na kubulaka, mpe ke pesa bakundima ya bawu ya kieleka.

⁵⁴ Bubu yayi, mulongi ya denomination, ata ti beno ke lakisa yandi na kati ya Ndinga, Kieleka, yandi zaba ve yinki ya kusala. Yandi kele na boma ti yandi ke zimbisa dimpa ya yandi. Beto kele na nsatu ya babakala mpe bakento bubu yayi yina kele na nzila na Nsangu ya mbote, muntu yina ke telama mpe ke tuba na bawu kundima, kutalisa yina kele mbote mpe yina kele yimbi, kana Ndinga ya Nzambi kele kieleka to kana denomination kele kieleka.

⁵⁵ Yesu tubaka, “Bika ti konso ndinga ya muntu kuvwanda luvunu, mpe ya Munu Kieleka. Mazulu na ntoto ke luta, kasi Bandinga ya Munu ke luta ata fioti ve.”

⁵⁶ Na yawu, beno me mona, bawu ke kwenda na zulu ya camp ya Ndinga ya Nzambi, samu na kuzwa mvutu ya bawu. Beto . . . yandi vwandaka . . . ndimisa bawu na camp ya Ndinga ya Nzambi, mutindu yandi salaka na Eve na disamba ya Eden, Satana me sala kima mutindu mosi bubu yayi. Mbote mingi. Beto ke mona yawu. Bantu me ndima ba-dogme ya bawu mpe ba-credo ya bawu na ngaanda ya camp, na kati ya ba-dogme ya bawu mpe ba-credo ya bawu. Bawu me kuzwa camp, mpe, mpe yina ke tula bawu na camp ya yandi. Yandi kele camp ya ndongosolo, ya théologie, ya bisalu, ya diplome ya badokotolo, ya lukolo, ya kimuntu, nionso yina kele ya kuswaswana na camp ya Ndinga ya Nzambi. Nzambi kele na camp samu na bantu ya Yandi. Denomination kele na camp ya bawu mosi.

⁵⁷ Bamvula mafunda tatu me luta, muntu mosi lendaka kutana na Nzambi bisika nionso. Ya vwandaka kima mosi ya mumesanu samu na muntu na kukutana na Nzambi. Kasi samu na yinki bawu ke kutana na Yandi ve bubu yayi? Ya kele na bantu mingi, mafunda na mafunda mpe mafuku ya bantu kulutila yina vwandaka na bamvula mafunda tatu me luta, mpe kasi Nzambi kele mwa kima mosi ya ntama yina ba zonzilaka, mwa disolo mosi ya ntama. Bawu ke kutana na Nzambi ve, na kati ya muntu, mutindu bawu salaka bamvula mingi me luta, mutindu mu tubaka, mafunda tatu, mwa bamvula mafunda tatu me luta. Ba ke salaka yawu ve. Ya kele ve ntangu nyonso samu na muntu na kukutana na Nzambi. Kana muntu mosi kutuba yawu, yandi ke talana muntu ya kulawuka, muntu yina me zimbisa mabanza ya bawu. Ya kele ya kulunga ve samu na bawu!

⁵⁸ Na diambu ya Abraham mpe na kati ya camp ya yandi, na yina, ya vwandaka na kutala na ntangu ya konso kilumbu yina Abraham kutanaka na Nzambi. Yandi zonzaka na Yandi. Kaka yina ve, kasi ntangu bawu kotaka na Guérar, samu na kuzinga; beto ke mona ti, kuna, ti Nzambi vwandaka na kati ya camp na Abimélec, Philistin. Ya vwandaka kieleka kima mosi ya mutindu nyonso. Bawu vwandaka zinga na camp ya Mvwandulu ya Yandi.

Bubu yayi, bawu ke zinga na camp ya bawu mosi, mpe bawu ke na kima ya kusala ve na camp ya Nzambi. Bawu zola kima

ve ya kusala na yawu, samu ti ya kele mutindu ya bufanatiki na yinza. Ya kele bufanatiki samu na bawu. Kasi, beno bambuka moyo, ntangu Nzambi yidikaka camp ya ntete samu na bantu, Yandi pesaka bawu kikesa na Ndinga ya Yandi. Yandi ke salaka ntangu nionso. Kasi, bubu yayi, na ba-camp ya bawu, ba ke sala yawu ve. Ya kele samu na yina beno ke kuwaka mingi ve na yina me tala Nzambi. Ntangu yayi, mu ke kwikila ti—ti camp. . .

⁵⁹ Mutindu Moise, mutindu Yandi kutanaka na Moise na ntoto ya kuyuma. Moise vwandaka na camp kuna kisika yandi vwandaka pesa madia na mameme ya bokilo ya yandi ya bakala, Jethro, na manima ya ntoto ya kuyuma. Mpe kilumbu mosi, na muvungi yayi ya ntama ya bamvula makumi nana, yandi monaka Nsemo mosi, Dikunzi ya Tiya na divunda, ya tiya. Mpe yandi kutanaka na Nzambi; muntu yina vwandaka kima na Nzambi.

Kilumbu yina landaka. Bantangu yankaka kukutana Nzambi ke salaka beno kusala bima ya mumesanu ve. Moise vwandaka ya mumesanu ve, kilumbu yina landaka. Yandi vwandaka na kento ya yandi ya kuvwanda na zulu ya mulet, na bébé na luketu na yandi; mpe mandefo ya yandi ya yinda, na nkawa ya kutengama na diboko ya yandi, ke kwenda na Egypte, samu na kuyala yinsi. Ntangu yayi, yina vwandaka kumona ya nsoni!

“Wapi kisika nge ke kwenda, Moise?”

“Kwenda na Egypte.”

“Samu na yinki?”

⁶⁰ “Kubotula yawu!” Yandi kutanaka na Nzambi. Kuyala ya makesa na nzila ya muntu mosi. Ya monanaka ya ngitukulu. Kasi, kima ya yawu vwandaka, yandi salaka yawu, samu yandi kutanaka na Nzambi. Kaka mutindu muntu mosi ke baka Russie; yawu yina kaka beno ke na yawu nsatu, muntu mosi na luzolo ya Nzambi. Moise vwandaka na kati ya luzolo ya Nzambi. Mpe nkawa ya kutengama yina yandi vwandaka na yawu na diboko ya yandi, mbele ve; nkawa. Bima ya mumesanu ve, Nzambi ke salaka yawu.

⁶¹ Kasi, beno bambuka moyo, Moise zolaka basika na ngaanda ya camp yina yandi vwandaka zinga, samu na kusala yayi, samu yandi vwandaka kuna na makesa nionso mpe lendaka ve kusala yawu. Na makesa nionso ya Egypte, yandi lendaka sala yawu ve. Kasi kilumbu mosi Nzambi bokilaka yandi na camp ya Yandi.

Yandi tubaka, “Nani Nge kele?”

⁶² Yandi tubaka, “MU KELE YINA KELE.” Ve, “Mu vwandaka, to ke vwanda.” Na ntangu yayi, “MU KELE! Mu kele Nzambi ya Abraham, Isaac, mpe ya Jacob. Mu me kuwaka kuboka ya bantu, mpe mu me bambuka moyo na nsilulu ya Munu, mpe yayi kele ntangu samu na yayi kusalama. Mu ke fidisa nge, Moise, na nkawa yayi yina kele na diboko ya nge.”

⁶³ Yinki ya vwandaka? Yandi, ntangu yayi, bantu banzaka ti yandi vwandaka kilawu. Kasi yinki yandi salaka? Yandi basikaka na ngaanda ya camp ya yandi mosi. Pharaon longaka yandi bamvula makumi yiya na kati ya camp ya lukolo, mpe yandi kubwaka. Mpe ya bakaka Nzambi bamvula makumi yiya yankaka samu na kubasisa yawu na yandi. Malongi ya yandi nyonso mpe théologie ya yandi nyonso yina ba longaka yandi, ya bakaka bamvula makumi yiya samu na kubasisa yawu na yandi. Mpe kuna Nzambi sadilaka yandi bamvula makumi yiya.

⁶⁴ Nzambi ke lutisaka ntangu mosi ya ngolo samu na kukubika muntu ya Yandi. Kasi, beno me mona, Yandi lendaka ata fioti ve kuzwa Mos-. . . kusimba Moise, tii kuna Moise basikaka na ngaanda ya camp ya yandi mosi, na mutindu ya basoda ya kusala yawu, mpe mutindu ya kimuntu ya kusala yawu, na mutindu ya mazulu ya kusala yawu. Na yina, ntangu yandi kotaka na camp yina, Nzambi lendaka sadila yandi.

⁶⁵ Ntangu yayi, beto ke mona ti na ntoto ya kuyuma yayi. . . Beto ke tala ntangu bawu bakaka mpe bakaka ntelamanu ya bawu, mpe basikaka na ngaanda ya Égypte, na camp ya Nzambi; bawu basikaka na ngaanda ya camp ya banganga-Nzambi mpe bawu nionso vwandaka tuba, “Beno kukiteka beno mosi mutindu bampika, samu na ntangu nionso.” Ntangu Moise profete kulumukaka mpe siamisaka Ndinga ya Nzambi vwandaka pene-pene, ti Nzambi Yina pesaka nsilulu vwandaka kuna samu na kuvulusa bantu; bawu kwendaka ntama ya camp bawu vwandaka, na kati ya camp ya Ndinga ya ngunga yina Nzambi silaka. Bawu kwikilaka profete yina, samu kidimbu ya kimbangi vwandaka monisa ti yawu vwandaka kieleka Ndinga ya Nzambi. Mpe bima yina yandi salaka talisaka ti ya vwandaka kieleka, mpe Dikunzi ya Tiya vwandaka landa yandi, talisaka ti ya vwandaka Ndinga ya Nzambi.

⁶⁶ Ntangu yayi, na kati ya camp yayi, bimangu, bidimbu, mpe mambu ya ngitukulu vwandaka na kati ya camp yayi.

Ba nataka bawu na ntoto ya kuyuma. Ba bikaka camp ya bawu ya kimuntu. Ba bikaka camp ya poto-poto. Bawu bikaka camp yina salamaka na nianga mpe biliki, samu na kuzinga na kati ya batenta kuna na ntoto ya kuyuma, kisika ya vwandaka ve na mbuma to kima yankaka. Bantangu yankaka Nzambi ke lombaka beto na kusala bima ya bulawu, na dibanza ya beto mosi. Mpe kana beno bika camp ya kikuma ya beno mosi, ya kele kisika yina beno ke kuzwa Nzambi.

⁶⁷ Beno tala, mutindu bawu kwendaka na ntoto ya kuyuma, ya vwandaka na bimangu, bidimbu, ntangu bawu kotaka na camp yayi. Ntangu yayi beno bambuka moyo, bawu bikaka camp ya Égypte mpe kwendaka na ntoto ya kuyuma na camp ya Nzambi. Yinki mutindu nge me zaba ti ya vwandaka? Nzambi tubaka, “Bantu ya nge ke zinga bamvula nkama yiya, kasi mu ke basisa

bawu na diboko ya ngolo, mpe mu ke pesa bawu yinsi yayi awa.” Mpe bawu vwandaka na nzila ya bawu, na nzila ya Nsemo yina me siamisama, profete yina me siamisama, na bidimbu, mambu ya ngitukulu, ti Nzambi vwandaka na kati ya camp, mpe bawu vwandaka na nzila ya bawu. Bawu vwandaka na Dikunzi ya Tiya. Bawu vwandaka na profete. Bawu vwandaka na mani. Bawu vwandaka na bamaza ya moyo. Amen! Ba sobaka, ba sobaka terrain ya camping. Ba zolaka sala yawu. Ba lendaka ve kumona bima yina na Egypte. Bawu zolaka soba terrain ya camping, samu na kumona kimpeve.

⁶⁸ Mutindu mosi bantu ya kilumbu yayi fwana soba camp ya ba-denomination yayi ke tubaka, “Bilumbu ya bimangu me luta. Ya kele ve na kima mutindu mbotika ya Mpeve-Santu. Mpe Masonuku nyonso yayi kele yimbi; mpe bawu ke salaka samu na nsungi yankaka.” Beno fwana soba kisika ya beno ya kuzingila, samu na kukwenda na ngaanda ya camp yina, na kisika bima nionso fwana salama.

⁶⁹ Bawu nionso vwandaka siamisa Mvwandulu ya Yandi na kati ya camp. Ntangu yayi beno tala kuna, bawu, bawu salaka camp ya binkulu yina me salama na maboko ya muntu, na manima Moise kufwaka. Mpe Nzambi salaka na bantu bamvula mingi. Nzambi kele ve na kati ya camp ya Yandi, diaka, na kati ya camp ya bawu, samu ba salaka bawu camp, na camp ya bawu mosi.

⁷⁰ Beno bambuka moyo, ntangu ba bokilaka bawu na kubasika na Egypte, Nzambi kubikaka bawu profete, pesaka bawu munkayulu ya mwana-dimeme, pesaka bawu nyonso yina bawu vwandaka na yawu nsatu; ndinga, kidimbu, kimangu, profete samu na kutwadisa bawu, kukatula-masumu samu na kukeba bawu, Dikunzi ya Tiya samu na kutwadisa bawu. Mpe ntangu bawu kwendaka na ntoto ya kuyuma, bawu vwandaka kaka na kiese ve. Bawu zolaka kima bawu zolaka sala, bawu mosi. Lemvo kukubikaka yawu; ntangu yayi bawu zola kima ya kusala, bawu mosi, na yina ba lendaka sala bawu organisation, mpe kuswana mpe kunwana, nani zolaka vwanda nganga-nzambi ya mbuta, mpe nani ke vwanda *yayi*, *yina*, to *yankaka*. Kilumbu mosi, Nzambi tubaka, “Moise, kabwana nge mosi na bawu,” mpe Yandi minaka bawu na kukolama ya Koré.

⁷¹ Ntangu yayi beno tala, bidimbu yayi nionso mpe mambu ya ngitukulu siamisaka Mvwandulu ya Yandi.

Na manima yandi salaka...muntu salaka camp ya yandi mosi, camp ya credo mpe ya kinkulu, ve camp ya Nzambi ya Ndinga ya Yandi. Camp ya bawu mosi! Yandi zolaka bika bawu, samu Yandi kele Ndinga. Yandi lendaka bikana ve kisika bantu me longamaka na Ndinga yayi. Nzambi lenda vwanda ve na kati ya camp. Yandi lenda ve. Yandi salaka yawu ata fioti ve. Yandi fwana bikana kaka kieleka kisika Ndinga ya Yandi kele.

⁷² Ntangu Yandi zolaka bika camp yina, kuna, na nkonga yina ya muvimba ya bantu yina Yandi basisaka na ngaanda ya Egypte, Yandi zingaka kaka na kati-kati ya baprofete ya Yandi, na bayina Ndinga ya Yandi kwizaka. Ndinga kwizaka na profete, samu na kusiamisa ngunga. Yandi zingaka na kati-kati ya baprofete, mpe monikisaka na baprofete. Mutindu bawu singaka, bantu, mpe singaka kima yango. Mpe Nzambi longaka bawu misiku ya Yandi mpe mutindu ya luzingu. Mpe bantu vwandaka telemina yawu ntangu nionso, mpe talisaka mpasi na profete, mpe na nsuka ba losaka yandi matadi, to ba losaka yandi na bitini-bitini, mpe ba katulaka yandi.

⁷³ Yesu tubaka, “Nani ya baprofete batata ya beno kufwaka ve? Nani ya bawu, ya bayina kaka ba fidisaka na bawu?” Mpe yandi tubaka, “Beni ke sala bisalu ya tata ya beno.” Yandi vwandaka tuba ve na ba-communiste. Yandi vwandaka solula na banganga-Nzambi, bantu ya denomination, ba-Pharisien mpe ba-Sadducéen. Mu banza ti ndinga ya Yandi ke sobaka mingi ve na nokila yayi, ke vwanda kaka mwa yimbi mingi, mu banza, na bawu.

⁷⁴ Ntangu yayi, beto ke mona ti Yandi zingaka kuna na kati-kati ya baprofete ya Yandi. Yandi na yina kumaka nzenza samu na bawu, samu Yandi ke zingaka kaka na kati ya Ndinga ya Yandi, samu na kusiamisa Yawu. Biblia ke tuba ti Yandi ke kebaka na zulu ya Ndinga ya Yandi, samu na kusiamisa Yawu. Yandi ke na kumeka na kuzwa muntu mosi.

Kana Yandi lenda kuzwa ndambu ya ntima, mutindu Samson. Samson pesaka ngolo ya yandi na Nzambi, kasi yandi pesaka ntima ya yandi na Delila. Ya kele mutindu yina bambala mingi beto ke salaka, bubu yayi, beni pesa kaka kima mosi na Nzambi, kasi ata fyoti ve. Kasi, Nzambi zola beto nyonso.

⁷⁵ Ya kele mutindu police ya assurance, ntangu beni ke baka police ya assurance, beni fwana baka yawu ya muvimba. Mpe ya kele yina kivuvu yayi ya kusakumuka ke salaka samu na beto. Ya kele kifwani ya kufuluka na bima. Ya ke fuka nyonso yina beto kele na yawu nsatu awa na luzingu yayi, mpe mvumbukulu ya beto, mpe Luzingu ya Kukonda nsuka. Yawu na kati ya nyonso.

⁷⁶ Beni tala, Nzambi bikanaka na kati ya camp ya bawu bamvula nkama yiya. Samu na yinki? Yandi vwandaka diaka ve na baprofete. Kubanda profete Malachie, tii na profete Jean, bamvula bankama yiya, ya kele ve na mosi ya piné yina Israel salaka. Nzambi vwandaka na ngaanda ya camp. Bawu tulaka Yandi na ngaanda, na ba credo ya bawu mpe munimi ya bawu, mpe luswaswanu ya bawu na Ndinga. Bankama yiya ya bamvula kukondwa Ndinga! Kubanda profete mosi na yankaka, Yandi salaka nzietelo, tii kuna profete ya nsuka vwandaka Malachie, mpe kuna ya vwandaka ve na profete yankaka bamvula bankama yiya.

⁷⁷ Mpe kuna Nzambi kotaka diaka na kusalu. Kilumbu mosi Yandi tambulaka na kati-kati ya bawu diaka, kasi binkulu ya bawu bakaka kisika ya Yandi na kati ya bawu, Yandi vwandaka nzenza samu na bawu. Binkulu ya batata, ya vwandaka na kusukula ya banzungu, mpe—mpe mutindu ya kusanula bansuki ya bawu, mpe kulwata babuto yayi na zulu ya kazaka ya bawu, mpe kieleka bilele ya bawu banganga-Nzambi—banganga-Nzambi; mpe—mpe mosi kele Pharisien ya kukwikama, mpe yankaka yina kele Sadduceén. Mpe yina bakaka kisika ya Ndinga na kati-kati ya bantu yina, tii, ntangu Nzambi kwisaka tala bawu, Yandi vwandaka nzenza.

⁷⁸ Bika mu tuba yayi na zola mpe luzitu, kasi samu na kunata yawu na yinzo. Ya kele kima mutindu mosi bubu yayi. Ya me sobaka ata fyoti ve. Ntangu Yandi ke kwisa na kati ya bantu, na ngolo ya Yandi mpe kumonisama, samu na kusiamisa ti Ndinga ya Yandi kele mutindu mosi mazono, bubu yayi, mpe kukonda nsuka, samu ti Yandi kele Ndinga, bantu ke tubaka, “Ngangan-kisi, Béelzébul, Yesu kaka, to—to kima ya mutindu yina.” Kalasi yankaka beno kisika mosi, kasi ya fwana vwanda mutindu yina.

Beno me mona, beto kuzwaka ve profete ntangu yayi pene ya bamvula mafunda zole. Bantu ya makanda kuzwaka mosi ve, beno zaba; ba silaka na nsuka. Ntangu yayi, beto zaba yawu, na nzila ya Masonuku. Beto zaba yawu, mpe, na nzila ya masolo ti yayi ba silaka beto.

⁷⁹ Ntangu yayi, na manima ya bamvula bankama yiya, Nzambi tambulaka kaka na kati-kati ya bawu kilumbu mosi. Landila Masonuku, Yandi zolaka kuma nsuni mpe kuzinga na kati-kati ya bawu. “Ba ke bokila Yandi Konseye, Ntinu ya Ngemba, Nzambi ya Ngolo nionso, Tata ya Kukonda nsuka.”

Mpe ntangu Yandi kwizaka na kati-kati ya bantu, bawu tubaka, “Beto ke vwanda ve na Muntu yayi kuyala na zulu ya beto! Yinki—yinki kalati ya kimpangi Yandi ke na yawu? Wapi denomination fidisaka Yandi?” Yandi vwandaka ve na ngwisani mosi. Konso dibuundu Yandi kwendaka, ba losaka Yandi na ngaanda. Ba vwandaka ve na kima ya kusala na Yandi, samu ti Yandi vwandaka ve mosi ya bawu.

Mpe mutindu ya vwandaka kuna, mutindu mosi ya kele ntangu yayi! Biblia ke tuba ti dibuundu ya Laodicée ke tula Yandi na ngaanda, mpe Yandi vwandaka konkota, vwandaka meka na kukota. Ya kele na kima ke tambula mbote ve kisika mosi kuna.

⁸⁰ Ntangu yayi, samu na yinki? Ba salaka camp ya bawu mosi. Bawu, kana bawu zabaka Ndinga, bawu zolaka zaba Nani Yandi vwandaka. Yesu tubaka, “Kana beno... Beno tala Masonuku, samu na yawu beno ke banza ti beno kele na Luzingu ya Kukonda nsuka. Ya kele bayina ke tubaka na beno Nani mu kele!” Ya kele yina Masonuku ke tuba. Ntangu yayi, “Yawu ke

pesa kimbangi ya Munu. Mpe kana mu ke sala ve bisalu yina ba silaka samu na Munu na kusala, kana Mu ke sala ve bisalu yina Tata ya Munu, Ndinga... 'Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga kumaka nsuni mpe zingaka na kati-kati ya beto.' Ntangu yayi, kana mu kele Muntu yina, beno tala Masonuku mpe beno mona yina mu fwana sala. Mpe kana mu kele ve ya kulunga; kana bisalu ya Munu, bisalu yina Ndinga ke siamisa, Tata ke siamisa Munu, kana bawu ke siamisa ve Nani mu kele, na yina mu kele na yimbi." Ya kele kieleka. "Kana beno lenda kwikila Munu ve, beno kwikila Ndinga," Yandi tubaka, "bisalu yina Ndinga ke basisaka."

⁸¹ Beno me mona, Yandi vwandaka nzenza na kati-kati ya bawu. Bawu zabaka Yandi ve. "Beto ke vwanda na kima ve ya kusala na Muntu yango, kaka Muntu ya ngitukulu yina butukaka kuna na kati ya kidikilu kisika mosi kuna." Mpe bawu kwikilaka ti mama ya Yandi vwandaka na Bébé yayi na ntuala ya yina Yandi butukaka, to na ntuala Yandi kuvwanda... kuzwaka Bébé yayi na mbutukulu ya makangu, mu zolaka tuba. Mpe na yina, bawu, ti ntete Bébé kubutuka, ti yandi kwendaka mpe kwelaka Joseph; mpe yandi salaka yawu kaka samu na kusimba kidimbu ya ndombe na yandi, nkadulu ya yandi. "Mpe Yandi kumaka mutindu ya ngitukulu ya Muntu, samu ti Yandi vwandaka mwana ya makangu, mpe ya kele samu na yina Yandi vwandaka."

Mpe ntangu Yandi basikaka, yinki Yandi salaka? Bawu ke pasula ba-credo ya bawu, ke balula bamesa ya bawu, ke basisa bawu na kisika, mpe ke tuba, "Ya kele ya kusunama!" Amen! Yina zolaka tuba na Nani Yandi vwandaka. "Ya kele ya kusunama!"

⁸² Mbote, bawu zolaka vwanda na kima ve ya kusala na Muntu ya mutindu yina. Kasi kuna na kati ya ntima ya bawu, ba zabaka Nani Yandi vwandaka, samu na Nicodeme tubaka yawu pwelele. "Rabbi, beto, ba-Pharisien, beto zaba ti nge kele mulongisi yina me katuka na Nzambi, samu ti muntu ve lenda sala bima yina beno ke salaka kana ti Nzambi kuvwanda na yandi." Samu na yinki bawu ndimaka Yandi ve kuna? Ya kele samu ti camp ya bawu tulaka ndilu ya yawu. Ya zolaka bika Yandi ve na camp. Ya zolaka bika ve muntu mosi kukwenda na Yandi. Ba vwandaka na camp ya bawu mosi. Yandi kwisaka na mpimpa, ntangu ba kangaka mwelo. Kasi yandi monaka ti yandi lendaka, kutanaka na Yandi, na mutindu nionso.

⁸³ Yinga, mutindu mosi ntangu yayi! Bawu me... Yandi me kuma nzenza, nzenza. Bawu ke bakula Yawu ve. "Samu na yinki yayi ke vwanda, mpe samu na yinki yina ke vwanda?" Ntangu, Ndinga Yawu mosi ke siamisa ti yayi kele kieleka yina zolaka salama na kilumbu yayi. Beto me zonzilaka yawu mingi, mingi mpe mingi, kasi ya kele Kieleka.

⁸⁴ Yandi vwandaka, samu na bawu na kati ya camp ya bawu, “Fanatiki, mubuki ya binkulu ya bawu, mubebisi ya mabuundu ya bawu, ya kieleka kaka nganga-nkisi, muntu ya kimpeve yina ba me bokila ‘Béélzébúl.’ Yawu yina Yandi vwandaka.”

Mpe mu ke kwikila, kana Yandi kwisa na kati ya beto bubu yayi, Yandi ke vwanda kima mutindu mosi, samu na beto. Samu ti, beto kele na kinkulu, beto kele na denomination, beto lenda vukana ve na mosi na yankaka. Samu na yinki? Ya kele kaka na kisika mosi yina muntu lenda baka, ya kele, na yisi ya Menga yina tiamukaka. Mpe Menga tiamukaka, mutindu nkuna ya luzingu, samu na kubuta Nkuna yayi, Ndinga. Na ngaanda ya yawu, minati ya denomination ya beto ke pekisa ntangu nyonso bantu.

⁸⁵ Kasi Yandi lenda vwanda nzenza bubu yayi. Ba ke bokila Yandi mutindu mosi. Yandi ke sala, ba ke tula Yandi na ngaanda ya camp. Mpe beno zaba. . .Biblia mosi yina tubaka ti ba ke manga Yandi na bantu, “Muntu ya kyadi, yina zabaka mbote mpasi,” mpe bawu mangaka, “mpe beto talaka Yandi ti ba bulaka mpe talaka mpasi samu na Nzambi,” Masonuku ya kieleka yina me tuba yawu. Profete ya kieleka yina yimbaka, “Nzambi ya Munu, Nzambi ya Munu, samu na yinki Nge me bika Munu? Mikwa ya munu, bawu nionso ke tala Munu. Ba me tobola maboko ya Munu mpe makulu ya Munu.” Ntangu bawu vwandaka yimba nkunga yina na kati ya dibuundu; Munkayulu ya bawu, Nzambi yina bawu banzaka ti bawu vwandaka sadila, bawu vwandaka koma na kulunsi.

Mutindu mosi ya kele bubu yayi, Nzambi ya kieleka!

⁸⁶ Beno tala yina profete tubaka, Amos, ntangu yandi kotaka na Samarie. Mpe mwa meso ya yandi kumaka fyoti mingi mutindu yandi kwisaka kuna mpe monaka mbanza yina ya masumu, bakento vwandaka kuna na bala-bala, na bantu, Amerique ya bilumbu yayi. Ntangu yandi talaka na zulu ya yawu, meso ya yandi kumaka fyoti mingi. Mpe yandi vwandaka na muntu ve samu na kusimbisa yandi. Yandi vwandaka ve na kalati ya kimpangi. Nzambi fidisaka yandi. Bantu vwandaka kuwa Nsangu ya yandi? Ve, bawu vwandaka kuwa yandi ve. Kasi yandi pesaka profesu, mpe yandi tubaka, “Nzambi ya kieleka yina beno ke tubaka ti beno ke sadilaka ke bebisa beno.”

Mpe mu ke tuba, na Nkumbu ya Yesu Klisto: Nzambi ya kieleka yina yinsi yayi ke tubaka ti bawu kele, yinsi ya misambidi, nzambi ya kieleka yina bawu ke tubaka ti bawu ke sadilaka ke kufuma bawu na disumu ya bawu ya nkù. Yandi ke bebisa konso denomination na ntuala ya ntoto, yina bawu ke tubaka na kusadila.

⁸⁷ Na yawu, beno tala, Yandi sembaka bawu, mpe ba basisaka Yandi na ngaanda ya camp ya bawu. “Yesu talaka mpasi na

ngaanda ya camp.” Ba basisaka Yandi na camp, na ngaanda, na bandilu yankaka ya camp ya bawu.

⁸⁸ Beto ke mona ti Biblia ke tuba, na kilumbu yayi ya nsuka na yisi ya Nsungi yayi ya Laodicée, bawu ke sala kima mutindu mosi. Ba ke basisa bawu na ngaanda ya camp.

Ntangu yayi beno tala mbote yina Yandi tubaka na kusala ntangu yayi, samu na kumanisa.

“Ba me basisa bawu na ngaanda ya camp,” kisika minkayulu vwandaka yokama na tiya. Ya kele kisika Yandi kele mosi ya dibuundu. Yandi vwandaka Munkayulu.

⁸⁹ Ntangu yayi, mpangi-bakala, mpangi-kento, beno zaba ti mosi na mosi ya beno nionso fwana pesa munkayulu; beno fwana vwanda munkayulu ya Nzambi; munkayulu bima ya yinza; munkayulu ya beno mosi ya yinza yayi; munkayulu ya yinza? Beno zaba kikuma samu na yina bantu ke sala yawu ve?

⁹⁰ Beno zaba, dimeme, dimeme kele na yawu ve kasi kima mosi ya kupesa, mpe yina kele mika. Mpe, ntangu yayi, ba me lomba yandi ve na kubasisa to kusala mwa mika samu na mvula yayi. Ba me lomba yandi na ku- . . . na kulwata mika.

Ba me lomba beto ve na kusala kima mosi. Ba me lomba beto na kunata mbuma ya Mpeve. Ya kele, kati ya dimeme, yina yandi kele na kati, ke sala mika na ngaanda. Mpe ntangu muntu mosi me kuzwa Klisto na kati, ya ke kumisaka yandi mutindu Klisto na ngaanda, ve mwa kima mosi me salama na nzila ya bantu.

⁹¹ Mbote, beto ke mona ntangu ya ke salama, ntangu Klisto ke vutuka, wapi mutindu Yandi salaka? Ya kele kaka kieleka mutindu ya vwandaka na mbandukulu. Ntangu nyonso ke vwandaka.

⁹² Na yawu, Yandi sembaka bawu mingi, ti ba basisaka bawu na ngaanda ya camp ya Yandi, mpe salaka Yandi mutindu musumuki. Na yina, “Yandi kumaka disumu samu na beto.”

⁹³ Ntangu yayi, na manima ya bankama ya bamvula, yinga, ya me luta bamvula mafunda zole, Yandi me kwisa tala diaka camp ya bawu, landila Ndinga ya Yandi ya nsilulu yina Yandi ke sala na bilumbu ya nsuka. Yandi me kwisa tala diaka na camp. Yandi me kwisa tala camp, samu na kumonikisa Ndinga yayi bubu yayi.

Kaka mutindu Yandi vutukaka kutala na kilumbu yina, mpe Yandi salaka na kilumbu ya Moise. Yina vwandaka ve Moise vwandaka sala yawu; Moise vwandaka muntu. Ya vwandaka Klisto.

⁹⁴ Beno tala Joseph, luzingu; ya luzolo ya tata, ba yinaka yandi na bampangi ya yandi, samu ti yandi vwandaka mumoni. Mpe bawu yinaka yandi, kukondwa dyambu. Ya vwandaka kaka dyambu yina bawu zolaka kuyina yandi.

Kifwanukusu ya kulunga ya bubu yayi, kieleka. Dibuundu, dyaka, bawu ke yinaka bima ya kimpeve.

Mpe beto ke mona ti ba tekaka yandi pene ya bampata makumi tatu, na kubanzaka ti yandi me kufwa. Ba basisaka yandi kuna mpe tulaka yandi na boloko; mutindu Yesu vwandaka na kulunsi. Muntu mosi zimbanaka, mpe muntu mosi vulukaka; mpe ba katulaka yandi kuna tii na diboko ya kibakala ya Pharaon. Ya kele kieleka mutindu Yesu salaka.

⁹⁵ Ya vwandaka David, mpe kwendaka na babala-bala, na kudilaka, ntinu yina ba losaka; mpe vwandaka na zulu ya mongo, vwandaka dila na zulu ya Jérusalem. Yina vwandaka ve David. Mwana ya David, bamvula nkama na manima ya yawu, kuvwanda na zulu ya mongo mosi mpe dilaka samu ti ba losaka Yandi Ntinu na kati-kati ya bantu ya Yandi Mosi. Ya kele Klisto, ntangu nyonso.

Mpe, bubu yayi, ntangu ba pesaka profesi ti Klisto fwana kota na camp, beno zaba yina salamaka? Ya ke vwanda kaka kieleka mutindu ya vwandaka kuna. Ya fwana vwanda mutindu yina, samu na kulungisa yina Ndinga awa silaka ti Yandi ke sala.

⁹⁶ Ntangu yayi beno bambuka moyo, Klisto vwandaka na kati ya nsungi ya Noé. Yina vwandaka Klisto, “Yesu Klisto mutindu mosi mazono, bubu yayi, mpe kukonda nsuka,” Ndinga ya ngunga yina ba me losaka.

⁹⁷ Beno tala, mpe profesi ya Yandi ya Apocalypse 3, monaka, ntangu Yandi kwisaka na kilumbu yayi ya nsuka, mutindu Yandi pesaka profesi ti Yandi ke kwisa na kilumbu yayi ya nsuka. Mpe yinki mutindu Yandi monaka dibuundu na Laodicée? “Mvwama, kele na nsatu ya kima mosi ve.” “Mpe kuvwanda mutindu ntinukento mpe lenda mona mawa ve.” “Mpe tula Yandi na ngaanda ya dibuundu,” vwandaka ve na mfunu samu na Yandi. Yandi basikaka dyaka na ngaanda ya camp. Kasi kuna yandi zabaka ve ti yandi vwandaka kinkonga, mpofu, mpe muntu ya mawa; mpe zabaka yawu ve.

⁹⁸ Diaka, kana Yandi kwisa diaka mutindu Yandi vwandaka na ntangu yina, Yandi lendaka semba kento nionso yina lwataka bakupe. Yandi ke semba bakento nionso ya bansuki ya kuzenga, kizizi nionso ya kupakula, konso bakala yina me kulumuka mingi samu na kubika kento ya yandi kusala yawu. Yandi ke telama kaka, Yandi ke pasula konso denomination yina vwandaka, mpe ke buka konso credo yina beto vwandaka na yawu. Beno ke kwikila ti Yandi ke sala yawu? Kieleka Yandi ke sala yawu. Ya kele kieleka.

⁹⁹ Yinki bawu zolaka sala na Yandi? Bawu basisaka Yandi na ngaanda na camp. Kieleka bawu zolaka sala ve kintwadi na Yandi. Ve, tata!

¹⁰⁰ Ntangu yayi beto ke mona dyaka Yandi, na kilumbu yayi, mutindu Biblia ke tuba ti Yandi ke vwanda, ba me tula Yandi

na ngaanda ya camp. Samu ti Yandi kele kaka mutindu mosi, Ndinga, mutindu mosi mazono, bubu yayi, mpe kukonda nsuka.

¹⁰¹ Bawu—bawu zola Yandi ve. Bawu mangaka Yandi diaka, na kimvuka ya bawu. Bawu zolaka vwanda na mvibudulu, bubu yayi, mutindu bawu salaka kuna ntangu Yandi vwandaka na kumekama. Mpe bubu yayi, ntangu ba ke meka Ndinga, yinki salamaka? Bawu me manga dyaka mutindu bawu salaka kuna, mpe me ndima Barabbas, muntu ke kufwaka bantu, na kisika ya Klisto. Lukutakanu ke sala kima mutindu mosi. Mpe, bubu yayi, samu bawu me manga Ndinga mpe nsiamisa ya kulunga ya ngunga, bawu me kukitekisa mpe bawu zolaka Barabbas, Kimvuka ya Mabuundu ya Yinza, muntu yina ke kufwaka Ndinga. [Kisika ya mpamba na bande—Mu.]

¹⁰² Bawu ke manga Ndinga ya Yandi, ke manga mbotika ya Yandi, ke manga Ngolo ya Yandi, ke manga bidimbu ya Yandi. Mpe na credo mosi to kinkulu mosi diaka, ya kulwata col ya yandi ya kubalusa na manima, mpe nionso, ke sala bawu mosi ba-credo, mpe nyonso yina, bawu ke na kumeka, na zulu ya bisalu ya mbote. Ba tumaka bawu ve na Luzingu, na kubanda. Ba kuzwaka ve kima ya kukwikila na yawu.

“Yandi yina zaba Munu, zaba Tata ya Munu. Mpe mutindu Tata fidisaka Munu, na yawu fidisa Munu.” Nzambi yina fidisaka Yesu kwendaka na kati ya Yesu. Mpe Yesu yina ke fidisa beno ke kota na kati ya beno. “Yandi yina ke kwikila na Munu, yandi mpe ke sala bisalu yina Mu ke sala. Beno kwenda na yinza ya muvimba, mpe beno longa Nsangu ya mbote na bantu nionso,” ndombe, jaune, mundeke, mbwaki, nyonso yina yandi lendaka vwanda. “Bidimbu yayi ke landa bayina ke kwikila.” Wapi kisika? “Yinza ya muvimba, mpe na konso kivangu.”

¹⁰³ Mwa mulongi mosi ya Baptiste, ntama mingi ve na Tucson, kwizaka na munu, yandi tubaka, “Mpangi Branham, tala mpasi ya nge. Nge ke na kumeka na kusala yayi nsungi ya bantumwa.” Yandi tubaka, “Ya kele ve na kima mutindu nsungi ya bantumwa bubu yayi. Nsungi ya bantumwa me suka.”

¹⁰⁴ Mu tubaka, “Ya kele? Mu zabaka yawu ve.”

Na yina yandi tubaka, “Mbote, ya kele.”

Mu tubaka, “Kieleka?”

Yandi tubaka, “Kieleka. Mu ke kwikila,” yandi tubaka.

“Mbote mingi,” mu tubaka, “wapi faso?”

Yandi tubaka, “Ya vwandaka samu na bantumwa.”

¹⁰⁵ Mu tubaka, “Pierre tubaka, na Kilumbu ya Pantekote. Nge ke kwikila Ndinga ya yandi?”

“Yinga, tata.”

¹⁰⁶ “Yandi tubaka, ‘Beni balula ntima, mosi na mosi ya beno, mpe beno botama na Nkumbu ya Yesu Klisto. Samu ti nsilulu

yayi kele samu na beno, mpe bana ya beno, mpe bana ya bana ya beno, mpe samu na bayina kele ntama, mpe bayina nionso Mfumu Nzambi ya beto ke bokila.”

¹⁰⁷ Nsilulu mosi yayi, beto fwana vutuka na yawu! Dokotolo Simon Pierre sonikaka mukanda. Biblia ke tuba, “Ya kele ve na nkisi na Galaad? Ya kele ve na munganga kuna?”

Mbote, beno zaba, kana beno baka mukanda ya dokotolo. Ntangu yandi ke mona kimbevo yina kele na kati ya nzutu ya beno, mpe yandi ke sonika mukanda ya dokotolo yina; beno fwana fulusa yawu, kuzwa mwa muntu ya bankisi ya kieleka yina ke fulusa yawu kaka mutindu ya kele ya kusonika. Samu, ya fwana tula kuna na kati mwa mingi ya ndikila, mpe mwa mingi ya antidote, mwa mingi yina sysiteme ya beno ke baka. Beno me mona, yandi. . . Ba mekaka yimeni mpe ba talisaka, mpe beno fwana baka mukanda ya dokotolo yina. Kana beno sala yawu ve, beno ke bika mwa dokotolo mosi ya luvunu kukwenda kuna samu na kusoba yawu, ti yandi zaba ve mutindu ya kutesa doze ya nkisi yina mbote, yandi ke kufwa beno. Mpe kana yandi tula kulemba mingi, ya ke sala beno mbote ve.

¹⁰⁸ Mpe ya kele yina kele dyambu na mingi ya beno badokotolo. Beno ke na kusobaka mukanda ya dokotolo yina!

Pierre tubaka, “Mu ke pesa nge mukanda ya dokotolo ya mvula na mvula, samu na nge, mpe samu na bana ya nge, mpe bayina kele ntama, mpe bayina nionso Mfumu Nzambi ya beto ke bokila.” Ve, “Kwisa mpe kota.” Kasi, “Beno balula ntima, mosi na mosi ya beno, mpe beno botama na Nkumbu ya Yesu Klisto samu na mulemvo ya masumu, mpe beno ke kuzwa bandandu,” amen, “Mpeve-Santu. Samu na nsilulu, mukanda ya dokotolo yayi, kele samu na beno, mpe samu na bana ya beno.”

Ntangu yayi, bayankaka na kati ya beno badokotolo ya luvunu, beno bika kusonika mukanda yango ya muswa. Beno me mona? Beno ke na kufwa bantu ya beno. Uh-huh. Ya kele samu na yina Kima ya kieleka ke na kukumaka ve na bawu. Yinga.

¹⁰⁹ Beno zaba, na zulu ya mukanda ya dokotolo mosi yayi, mutindu dokotolo ke mona nkisi ya yandi. Bawu ke bakaka ntangu nionso mpe. . . Bantu ya mayele ke mekaka na kubakula kima mosi, na yina ba pesaka yawu na kobayi, mpe ba monaka kana ya ke kufwa yandi to ve.

Mpe kuna, beno zaba, nkisi, kele na siansi ya kubakama. Beno, beno lenda beluka, mpe ya lendaka kufwa beno, beno me mona, samu bantu nionso kele ve mutindu kobayi, mu banza.

Na yawu, kasi ya kele na kima mosi samu na mukanda ya dokotolo yayi, ya kele samu na nyonso.

¹¹⁰ Mpe, kuna, dokotolo mosi ya mbote ya kieleka yina ke ve. . . kele na lukwikilu mingi na nkisi ya yandi mosi, yandi ke yufula muntu yankaka ve. Mingi na kati ya bawu kele koyi-koyi ti ba

ke pesa bawu kitumbu ya kuvwanda muntu ya boloko ya mvula na mvula, mpe na manima ba ke tula yandi na kimpwanza kana yandi zinga na zulu ya yawu, ti yandi baka mukanda ya dokotolo.

¹¹¹ Kasi, na kisika yayi, beto vwandaka na Dokotolo ya kieleka. Yandi kwizaka, bakaka mukanda ya dokotolo, Yandi mosi. Benso me mona? “MU KELE.” Ve, “Mu ke vwanda.” “Mu kele mvumbukulu mpe Luzingu,” me tuba Nzambi. “Yandi yina ke kwikila na Munu, ata ti yandi me kufwa, kasi yandi ke zinga. Mpe muntu nionso yina ke zinga mpe ke kwikila na Munu ke kufwa ata fioti ve.” Marthe tubaka. . . Yandi tubaka, “Nge me kwikila na yayi?”

¹¹² Yandi tubaka, “Yinga, Mfumu, mu ke kwikila ti Nge kele Klisto yina zolaka kwiza na yinza. Ya lenda vwanda yinki mutindu bayankaka ya bawu ke bokilaka Nge, mu me mona yawu!”

¹¹³ Na Calvaire, Yandi bakaka ntunga Yandi mosi. Mpe na suka ya Paki, lufwa lendaka ve kukanga Yandi. “Mu kele mvumbukulu mpe Luzingu.” Ba me tsokota lufwa na kati ya Yandi, kasi Yandi vumbukaka, na lunungu na zulu ya lufwa, difelo, mpe ntoni. Yandi bakaka ntunga, Yandi mosi.

Mpe Yandi fidisaka mwa badokotolo samu na kusionika mukanda ya dokotolo, yina vwandaka na luzayikisu ya Nani Yandi vwandaka.

“Nani bantu ke tuba ti Munu kele Mwana ya muntu?”

¹¹⁴ Pierre tubaka, “Nge kele Klisto, Mwana ya Nzambi ya moyo.”

¹¹⁵ Yandi tubaka, “Vwanda ya kusakumuka, Simon. Nge me kuzwa yawu ntangu yayi. Mu me pesa nge bafungula ya Kimfumu. Nyonso yina beno ke kanga na zulu ya ntoto, mu ke kanga yawu na Mazulu. Kana beno zibula na ntoto, mu ke zibula yawu na Mazulu.”

¹¹⁶ Mpe na Kilumbu ya Pentecote, ntangu ba monaka nionso yayi kusalama, yandi tubaka. . . Bawu tubaka, “Yinki beto lenda sala samu na kuzwa ntunga yayi?”

¹¹⁷ Awa yandi tangaka mukanda ya dokotolo. Yandi tubaka, “Ntangu yayi mu ke sonika mukanda ya dokotolo. Ya kele samu na beno, mpe samu na bana ya beno, mpe samu na bayina kele ntama, ya mingi Mfumu Nzambi ya beto ke bokila.”

Benso sakana ve na mukanda ya dokotolo; beno ke kufwa! Ba ke salaka yawu ya kulemba mingi, bubu yayi, tii ya kele kima yankaka ve kasi maza ya denomination, ya kele kieleka, mwa liquide mosi ya kumbome ba ke kotisa na kati ya nzutu ya muntu ya kufwa samu yandi vwanda diaka ya kufwa.

Oh, kasi, mpangi-bakala, ya kele na kupakulama ya kieleka! Ya kele na nkisi na Galaad. Ya kele samu na kubeluka ya moyo. Benso sakana kaka ve na mukanda ya dokotolo. Benso

baka mukanda ya dokotolo kaka mutindu ba me sonikaka yawu mpe Nzambi me tumama na ngolo na Ndinga ya Yandi; ve ya kutumama na ngolo na credo, to dogme, to denomination. Yandi me tumama na ngolo na Ndinga ya Yandi. Beno landa mukanda ya dokotolo, yina kele lufulu ya ntete. Beno banda, na yina ba me sonika beno mpe me kubama na kukwenda na kisalu.

Beno tala, “na ngaanda ya camp.”

¹¹⁸ Ba me soola Barabbas bubu yayi. Ntangu Nsangu ya mbote me luta mpe nyonso, na yinza ya muvimba, bidimbu ya nene mpe mambu ya ngitukulu me landa reveil, kasi, na kisika ya kukota mpe kumeka na kusala yawu, bawu ke kota mbala mosi na Barabbas. “Ntete beto kuzwa buzoba yayi, mpe nyonso yankaka yina, na dibuundu ya beto, beto ke vwanda na kalasi mutindu bayankaka na kati ya bawu.” Ntangu yayi bawu kele na Rome mpe bawu nyonso kintwadi, Barabbas. Beno tala, beto kele kuna na camp ya nene yina.

¹¹⁹ Ba me bokila beto na kubasika na ngaanda ya camp yina. “Yesu mpe, ti Yandi lendaka santisa bantu na Menga ya Yandi Mosi, talaka mpasi na ngaanda ya mwelo. Beto kwenda na Yandi na ngaanda ya mwelo,” beno tala mbote, “na kunataka nsoni ya Yandi.”

¹²⁰ Samu na yinki ba pesaka Yandi nsoni? Ve samu ti Yandi vwandaka Methodiste to Baptiste, mu ke pesa beno kivuvu na yawu; ve samu ti Yandi vwandaka Pharisien to Sadducéen. Samu ti Yandi vwandaka Ndinga yina me siamisama.

¹²¹ “Na kunataka nsoni ya Yandi,” samu (yinki?) Ndinga yina me siamisama. Ya kele kieleka. Ya vwandaka yina Yandi salaka. Yandi tubaka, “Kana Mu ke sala ve bisalu ya Tata ya Munu, beno kwikila Munu ve; kana mu kele ve mvutu na bakyuvu nyonso ya Masonuku.”

¹²² Yesu ya Ngwisani ya Malu-malu vwandaka Yehowa ya Ntama. Kieleka kaka! Mu banza, mutindu mu vwandaka tuba na beno awa ntangu yayi, mwa ntangu me luta, to kisika mosi na lukutakanu. Ya lendaka vwanda awa ve. “Yehowa ya Ngwisani ya Ntama kele Yesu ya Malu-malu.” Beno ke bambuka moyo na . . .

Ntangu mu vwandaka kwenda zomba mpadi na suka yina, mpe kuna ya vwandaka, ba-tige tatu ya nene yayi kumaka na mosi kuna, kaka na zulu ya mongo; mu vwandaka ya kutelama kuna vwandaka tala yawu. Mpe mu kumaka pene-pene mpe mu katulaka yimpu ya munu, mu tulaka munduki ya munu, mu mataka kuna. Mpe Ndinga ningisaka bayinti, tubaka, “Yesu ya Ngwisani ya Malu-malu kele Yehowa ya Ntama. Bikana ya kukwikama.” Kuna kaka na yisi ya kele kisika bampadi monikaka, kuna, yandi vutukaka na luzingu ntangu ya vwandaka ve na mosi kuna. Beno me mona? Ya kele Kieleka. Beno me mona? Ya kele kieleka. Na yawu, Nzambi zaba, ntete

Nani mu me telama, ya kele Kieleka ya yawu. Ya kele kieleka. Ya kele Kieleka.

¹²³ Kuna na Kentucky; mpe ya kele na bantu yina kele ya kuvwanda kaka awa na nkokila yayi, yina vwandaka awa ntangu ya salamaka dyaka, kima mutindu mosi. Yinga. Beto zaba ti ya kele Kieleka; Yesu ya Ngwisani ya Ntama!

¹²⁴ Mutindu ntangu ba-Chinois kwisaka awa, ba lendaka ve kutanga to kusonika ndinga ya beto, kasi ba vwandaka basukudi ya nene ya bilele. Mpe na yina bawu vwandaka . . . Ba vwandaka kwenda na kisika ya ba-Chinois yina ke sukulaka bilele. Ya vwandaka baka kaka mwa ba-etiquette ya fioti, ya mpembe. Yandi lendaka ve kutanga kima mosi, mpe yandi zabaka ti beno lendaka ve kutanga yawu kana yandi sonikaka yawu. Na yawu, ntangu beno ke kwiza, yandi bakaka kaka mwa kitini yayi ya mpembe ya papié, kima mosi na ndonga *yayi*, ke tuba, kaka awa, mpe yandi pasulaka yawu mutindu *yina*. Ntangu yayi, yandi pesaka beno kitini mosi ya papié, mpe yandi bumbaka kitini yankaka ya papié. Mpe na tangu yina ntangu beno ke vutuka samu na lele ya beno, yandi tubaka, “Bika mu mona kitini ya beno ya papié.” Mpe yandi kuzwaka yawu; kana ya fwanakana, ya vwandaka yawu. Beno kele na bilele ya beno ya mvindu ya me vutuka ya kutsyema.

¹²⁵ Mpe Yesu fwanakanaka na konso profesii; konso kizizi ya fyoti ya Yehowa ya Ngwisani ya Ntama kele Yesu ya Malu-malu. Yandi fwanakanaka na kima nionso.

Bika mu tuba yayi na boma ya kinzambi mpe luzitu, kasi zola, kasi kieleka ya kuzaba kisika mu me telema. Nsangu ya ngunga yayi me fwanakana na konso kima yina Biblia zonzilaka samu na ngunga yayi. Ntangu yayi, kana beno kele na mwa bilele ya mvindu, beno balula yawu. Uh-huh. Ba yobisaka beno na Menga ya Mwana-dimeme?

¹²⁶ Beno tala, “na kunataka nsoni ya Yandi,” samu ti Yandi vwandaka Ndinga yina me siamisama. Mutindu na ntangu yina, mutindu mosi ya kele ntangu yayi, Yandi kele mutindu mosi mazono, bubu yayi, mpe kukonda nsuka. Hébreux 13:12 mpe 13. Beto ke mona Hébreux . . . 8, 13:8, mpe. “Na kunataka nsoni ya Yandi,” ya Nsangu ya mbote.

¹²⁷ Na kunataka Nkumbu ya Yandi! Yandi tubaka, “Mu me kwiza na Nkumbu ya Tata ya Munu.” Yinki kele Nkumbu ya Tata? Yandi kwizaka na Nkumbu ya Tata ya Yandi. Yandi tubaka, “Mu kwizaka na Nkumbu ya Tata ya Munu mpe beno yambaka Munu ve.” Mbote? Yinki kele Nkumbu ya Tata? Mu banza ti beno fwana zaba. Beno me mona?

Na kunataka nsoni ya Ndinga. Ya vwandaka natama ntangu nyonso na ngaanda ya ba-camp ya bawu. Ba basisaka Yawu na ngaanda. Ba ke seka beno, mpe ba ke sawula beno.

¹²⁸ Mpe, bubu yayi, kisika mu bandaka mbala mosi na yinsi . . . Mu ke na kuzonzila ve munu mosi; pardo beno banza ve ti yayi kele diambu ya muntu yandi mosi. Kasi, ntangu ya munu me kwenda, mpe mu kele na ba-page kumi awa. Beno lenda mona yina me bikana awa, beno me mona, beno me mona, mbote mingi, banoti. Kasi, beno kuwa. Kubanda ntete . . .

¹²⁹ Beno talaka Yesu ntangu Yandi bandaka ntete? “Oh, Rabbi ya ntwenia. Oh, Yandi vwandaka Muntu ya mbote! Kwisa na nzila ya beto. Kwisa longa beto.”

¹³⁰ Kasi kilumbu mosi Yandi vwandaka na bawu, mpe Yandi tubaka, “Kana ti beno kudya ve nsuni ya Mwana ya muntu, mpe kunwa Menga ya Yandi, beno ke kuzwa ve Luzingu na kati ya beno.”

¹³¹ Yinki beno ke banza ti badokotolo mpe nkonga ya bantu ya mayele banzaka? “Muntu yayi ke kunwaka menga ya bantu.” Beno me mona? “Yandi zola ti nge kunwa menga ya muntu. Yina kele ya kulutula mingi samu na beto. Beno kwenda ntama na Yandi. Bawu . . . banganga-Nzambi tubaka ti Yandi vwandaka kilawu; mu ke kwikila yawu.” Mpe Biblia ke tuba ti bawu kwendaka.

¹³² Kuna Yandi kuzwaka milongi makumi sambwadi yina ba byekaka. Mpe Yandi tubaka, “Mu lenda ve kuzwa bawu.”

Na yina Yandi talaka bawu, Yandi tubaka, “Yinki beno ke tuba ntangu beno ke mona Mwana ya muntu kumata na Mazulu kisika Yandi me katuka?” Ntangu yayi, Yandi ata mbala mosi ve tendulaka bima yayi. Yandi bikaka kaka yawu swi. Beno me mona?

¹³³ Mpe bawu tubaka, “Mwana ya muntu? Yinki? Beto ke kudya na Muntu yango. Beto ke lobaka mbisi na Yandi. Beto me vwandaka na kumu ya masa na Yandi. Beto monaka berceau yina ba vwandaka tula Yandi. Beto zaba mama ya Yandi. Beto zaba mpangi ya Yandi ya bakala. Nani lenda kuzwa kima mutindu Yayi?”

Mpe Biblia ke tuba, “Bawu tambulaka na Yandi diaka ve.”

¹³⁴ Kuna Yandi balukaka na Pierre mpe bayankaka, tubaka, “Mu soolaka kumi na zole, beno kumi na zole.” Ntangu yayi, kubanda na mafunda, Yandi me kulumuka na bamvula kumi na zole. Yandi tubaka, “Mu soolaka kumi na zole. Kuna, mosi ya beno kele dyabulu. Mu zabaka yawu, kubanda mbandukulu.” Yandi tubaka, “Ntangu yayi beno zola kwenda na bawu?”

Yandi zolaka ve kubondila mpe kuleba, mpe, “Mu ke sala nge diakre kana nge kota na dibuundu ya munu.” Beno me mona? Yandi vwandaka ve na ndandu. Yandi tendulaka yawu ata fioti ve. To ve bilandi tendulaka yawu ata fioti ve.

Kasi, beno bambuka moyo, Yandi tubaka kaka na bawu, “Mu zabaka nge ntete mbandukulu ya yinza. Mu tumaka beno na

kuzwa kyese na Munu.” Beno me mona? Ya vwandaka, “ntete mbandukulu ya yinza,” yina ba soolaka ntete.

¹³⁵ Bantumwa yayi telemaka kuna kaka ya kutumama ve. Ba lendaka ve kutendula yinki mutindu ba zolaka kudya nsuni ya Yandi mpe kunwa Menga ya Yandi. Ba lendaka ve kubakula yinki mutindu Yandi kulumukaka, ntangu Yandi vwandaka kaka kuna na bawu ntangu nionso. Yandi lendaka ve kutendula yawu. Bantu lendaka ve kutendula yawu. Muntu ve lenda tendula yawu.

Kasi Pierre salaka bampova yina ya mfunu. Kuyituka ve ti Yandi pesaka yandi bafungula. Yandi tubaka, “Mfumu, na nani beto ke kwenda? Beto me ndimisama. Beto me zaba ti Nge, mpe Nge kaka, kele ya kusiamisama na Ndinga ya nsilulu bubu yayi. Beto zaba ti Nge kaka kele na Ndinga ya Luzingu. Beto lenda tendula bima yina ve, kasi beto ke kwikila Yawu, na mutindu nionso.”

¹³⁶ Marthe ya fioti tubaka, “Mpangi ya munu ya bakala me kufwa. Yandi kele ya kulala na kati ya ntoni. Yandi me pola; yandi ke basika nsunga ya yimbi. Mfumu, kana Nge vwandaka awa, mpangi ya munu ya bakala zolaka kufwa ve. Kasi ata mpe ntangu yayi, nyonso yina Nge ke lomba na Nzambi, Nzambi ke pesa yawu na Nge.” Oh, la la!

¹³⁷ Yandi tubaka, “Mu kele mvumbukulu mpe Luzingu. Yandi yina ke kwikila na Munu, ata ti yandi me kufwa, kasi yandi ke zinga. Muntu nyonso yina ke zinga mpe ke kwikila na Munu, ke kufwa ata fioti ve. Nge me kwikila yawu?”

¹³⁸ Yandi tubaka, “Yinga, Mfumu. Mu lenda tendula yawu ve, kasi mu ke kwikila yawu. Mu ke kwikila ti Nge kele Klisto yina zolaka kota na yinza. Mu ke kwikila, na nzila ya Masonuku yina ba tangunaka, ti Nge ke zitisa misiku ya Yawu.”

¹³⁹ Yandi tubaka, “Wapi kisika nge me zika yandi?” Oh, la la! Kima mosi fwana salama. Konso piné ke sala kintwadi kaka na ntangu ya kulunga. Beno me mona?

¹⁴⁰ Yandi kwendaka na ntoni. Biblia ke tuba, “Yandi vwandaka na kitoko ve yina zolaka sepelisa beto.” Mu banza ti mwa Muntu mosi, ya mapeka ya kubwa, yina telamaka na mwa mapeka ya kubwa, ya kulemba mpe ya kulemba na kutambula.

Yandi tubaka, “Lazare, basika!” Mpe muntu yina kufwaka, bilumbu yiya, telemaka.

¹⁴¹ Kento ya Science Chrétienne. Beno lemvo kila munu kana mu me lwadisa bansatu ya beno; mu zola ve kutuba yawu. Kento ya Science ya Muklisto, kaka na dibuundu yayi, kutanaka na munu kuna kilumbu mosi. Mpe yandi tubaka, “Tata Branham,” yandi tubaka, “Mu ke zolaka malongi ya nge, kasi ya kele na kima mosi yina nge ke salaka mingi na zulu ya yawu!”

Mu tubaka, “Yinki yina?”

Yandi tubaka, “Nge ke pesaka lukumu mingi na Yesu.”

¹⁴² Mu tubaka, “Mu banza ti ya kele nyonso yina Yandi me telemina munu.” Benó me mona? Benó me mona? Benó me mona?

¹⁴³ Yandi tubaka, “Nge ke sala Yandi Nzambi.” Benó me mona, bawu ke kwikilaka ve ti Yandi vwandaka ya Bunzambi. Bawu ke kwikila ti Yandi vwandaka kaka muntu mutindu bantu nionso, mulongisi ya mbote, ya philosophe. Yandi tubaka, “Nge ke sala Yandi ya Bunzambi. Mpe Yandi vwandaka ya Bunzambi ve.”

¹⁴⁴ Mu tubaka, “Oh, yinga, Yandi vwandaka.”

Yandi tubaka, “Kana mu lakisaka nge, na nzila ya Biblia ya nge mosi, Yandi kele ve ya Bunzambi, nge ke kwikila yawu?”

¹⁴⁵ Mu tubaka, “Biblia ya Munu me tuba mutindu yina, mu—mu ke kwikila Ndinga. Ya kele Nani Yandi kele.”

Mpe yandi tubaka, “Na Santu Jean, kapu ya 11, ntangu Yesu kwendaka na ntoni ya Lazare, Biblia ke tuba ti Yandi dilaka.”

Mu tubaka, “Yinki ya fwana sala na yawu?”

Yandi tubaka, “Mbote, yina talisaka ti Yandi vwandaka Nzambi ve.”

¹⁴⁶ Mu tubaka, “Nge me kondwa kaka na kumona Nani Muntu vwandaka. Yandi vwandaka Nzambi mpe muntu. Mpe mutindu muntu, vwandaka dila, ntangu Yandi vwandaka dila samu na mawa ya bawu. Kasi ntangu Yandi telemaka mpe tubaka, ‘Lazare, basika,’ mpe muntu mosi kufwaka, bilumbu yiya, yandi telemaka diaka, yina vwandaka kulutula muntu.” Yinga, tata! Yinga, ya kieleka!

¹⁴⁷ Mpe mu ke tubaka bambala mingi, ntangu Yandi kulumukaka na mongo na nkokila yina, na nzala, Yandi vwandaka muntu. Yandi vwandaka na nzala na suka yina landaka. Yandi vwandaka muntu. Kasi ntangu Yandi bakaka mwa mampa zole mpe bambisi tanu, mpe disaka mafunda tanu, bakaka mampa sambwadi, yina vwandaka kulutula muntu. Yinga, tata. Yandi vwandaka muntu, na zulu ya kulunsi, ntangu Yandi bokaka, “Nzambi ya Munu, Nge me yambula Munu?” Ntangu Yandi bokaka, “Pesa Munu masa ya kunwa,” mpe bawu pesaka Yandi vinu ya ngayi mpe ya ndudi, Yandi vwandaka muntu, ke dila. Kasi na suka ya Paki, ntangu Yandi bukaka kidimbu nionso ya lufwa, difelo, mpe ntoni, mpe vumbukaka, Yandi vwandaka kulutula muntu.

¹⁴⁸ Yandi vwandaka bakala mosi na nkokila yina, yina vwandaka kuna na manima ya mwa bwatu yina kisika Yandi vwandaka kuna na bilandi, mpe mafunda kumi ya bampeve ya yimbi ya mubu zengaka ndefi ti ba ke kufwa Yandi na maza. Uh-huh. Kuna na kati ya mwa masuwa mosi ya ntama, mutindu kifiniku ya mulangi kuna, mutindu yayi; Yandi vwandaka ya kulemba mingi, ba vumbulaka Yandi ve. Yandi vwandaka muntu ntangu Yandi vwandaka ya kulala. Kasi ntangu Yandi tulaka

dikulu ya Yandi na lweka ya bwatu, na manima yandi talaka na zulu mpe tubaka, “Ngemba, vwanda swi,” mpe mipepe mpe bitembo ya ngolo tumamaka na Yandi, yina vwandaka kulutila muntu. Ya vwandaka Nzambi!

Kuyituka ve ti poète tubaka:

Na kuzingaka, Yandi zolaka munu; na
kufwaka, Yandi vulusaka munu;
Ya kuzika, Yandi nataka ntama masumu ya
munu;
Na mvumbukulu, Yandi nungisaka munu ya
mpamba ntangu nyonso:
Kilumbu mosi Yandi ke kwisa—oh, kilumbu ya
nkembo!

¹⁴⁹ Yinga, tata! Kwenda na ngaanda ya camp. Mu ke kipe ve yina ya ke kuta.

Kulunsi yayi ya busantu mu ke nata yawu,
Tii lufwa ke pesa munu kimpwanza,
Na manima mu ke kwenda na Yinzo, mu ke
lwata yimpu ya kimfumu,
Samu ti ya kele na yimpu ya kimfumu samu na
munu.

¹⁵⁰ Mu ke sukisa, mu ke tuba yayi. Mu vwandaka tanga disolo mosi na mwa ntangu fioti me luta, na zuzi mosi. Yandi vwandaka muntu ya kudedama, muntu ya mbote, yina ba zolaka mingi. Mpe ya vwandaka na nkonga ya bantu na kati ya mbanza yina banzaka ti ba lendaka kuzwa kima mosi, na yawu, bawu kuzwaka ya kufulukuka mingi, na yina bawu zibulaka yinzo mosi ya mambu ya yimbi, zibulaka nganda ya malafu, malafu, nionso ya mutindu yina. Ya vwandaka ya kuswaswana na musiku. Mpe ba kangaka bawu na nzila ya musiku, bantu ya luyalu, mpe ba nataka bawu na yinzo ya lufundusu. Mpe ntangu bantu nionso ya mbanza, mwa mbanza yayi me vukana kuna, bawu zabaka ti muntu yayi salaka bima mingi pene-pene kuna, muntu yina kimaka kisika ya yimbi. Mpe bawu—bawu, jury, talaka muntu yina zabaka dyambu, samu ti ba kangaka yandi na kusalaka diamabu. Mpe na yawu kuna zuzi talaka yandi ya kubwa, mpe ba pesaka yandi kitumbu kuna samu na bamvula mingi, kukondwa kufuta kima mosi, kukondwa mbokolo to kima mosi, yandi fidisaka yandi, samu ti ya kele yina musiku tubaka.

¹⁵¹ Bantu yina na ngaanda ya yinzo ya lupangu ya lufundusu mangaka yandi, mpe tubaka, “Nge zaba yinki? Muntu nionso na kati ya mbanza yayi ke yina nge!” Yandi tubaka, “Ba ke yinaka nge samu na kubaka lukanu yina na zulu ya muntu yina.” Ba vwandaka bantu yina ke salaka bansaka, bawu mosi. Mpe yandi tubaka, “Beto—beto nionso ke yina nge. Beto ke pona nge diaka ata fioti ve. Beto ke vwanda ata fioti ve mosi ya beto na voti

samu na nge,” vwandaka seka yandi mutindu yandi vwandaka tambula na bala-bala.

¹⁵² Yandi telamaka kaka mwa minuti, yandi tubaka, “Bika mu kuzwa ndinga.” Yandi tubaka, “Mu me sala kieleka yina vwandaka kisalu ya munu. Muntu vwandaka ya kubwa, ata nani yandi vwandaka. Mpe mu zolaka pesa yandi kitumbu landila musiku yina mu zengaka ndefi ti mu ke zitisa.”

Yandi tubaka, “Ba me yina nge na kati ya mbanza yayi!”

¹⁵³ Yandi tubaka, “Kasi ba ke zolaka munu mingi na yinzo, na bantu ya munu.”

¹⁵⁴ Beto lenda banza kima mutindu mosi, kana beno lenda lemvolila munu nzonzolo yayi. Mu telemaka samu na yina mu kuzwaka mpulusu, samu na kukeba Ndinga yayi ya Nzambi. Mu zaba ti ba-denomination ke yinaka munu samu na bima yina mu ke tubaka, kasi ba ke zolaka munu mingi na Yinzo ya Yandi, na kati-kati ya bantu ya Yandi.

Beto sambila.

¹⁵⁵ Mfumu Yesu, ba lendaka kuyina beto na yinza, kasi ba ke zolaka beto na Tata. Sadisa beto, Nzambi ya luzolo. Sadisa bantu yayi, ti mosi na mosi ya bawu, Mfumu, ti balusakumunu ya Nge ke bikana na zulu ya bawu. Bika beto basika na ngaanda ya camp ntangu yayi. Bika beto basika na ngaanda ya mabanza ya beto mosi. Bika beto tambula na nzila ya mabanza ya Nzambi. Mpe Biblia ke tuba yayi, “Bika ti mabanza yina vwandaka na kati ya Klisto vwanda na kati ya beno.” Na yawu bika ti beto banza mabanza ya Yandi, kubanza ya beto mosi ve, samu ti ntangu mingi beto kele na foti. Na yawu, samu na kuvwanda na kivuvu, bika ti dibanza ya Yandi bikana na kati ya beto. Mpe mabanza ya Yandi vwandaka kusala luzolo ya Tata, mpe luzolo ya Tata kele Ndinga ya Yandi ya nsilulu.

¹⁵⁶ Bika beto basika na ngaanda ya camp, na nkokila yayi, Mfumu, mpe beto mona Yesu. Beto ke mona Yandi ata fioti ve na nzila ya kukota na dibuundu. Ata mbala mosi ve ti beto ke mona Yandi na kupesanaka mbote na mulongi mosi, to—to na kusinié credo mosi, to kima yina beto silaka, samu na kukwenda na lukolo ya Lumingu bilumbu mingi na mvula, mpe nionso yina. Beto ke mona kaka Yandi na kati ya Ndinga, samu ti Yandi kele Ndinga.

¹⁵⁷ Mpe mutindu beto ke mona kilumbu yayi ba silaka, ti Yandi ke vwanda na ngaanda ya camp, ba ke basisa yandi dyaka na ngaanda; ntangu yayi bika beto basika na ngaanda ya camp, ya kukubama samu na kunata nsoni ya Yandi; yina ba yinaka na yinza yayi, kasi yina ba zolaka ya Yandi Yina bokilaka beto na Camp. Pesa yawu, Mfumu.

¹⁵⁸ Kana ya kele na bayina awa yina me zaba Yandi ve, mpe me basika ntete ve na ngaanda ya camp ya mwa kuvukana na

dibuundu mosi, kasi beno ke tuba ti beno kele Muklisto. Kasi ntangu beno ke tuba, “Bima yayi, mu ke kwikila, kele samu na kilumbu yankaka,” yina ke lakisa ti ya lenda vwanda ve Mpeve-Santu.

Yinki mutindu muntu yina kele ya kufuluka na Mpeve-Santu lenda botama na kusadilaka nkumbu ya “Tata, Mwana, Mpeve-Santu”? Ntangu, Paul, ntumwa ya nene, tubaka, “Kana Wanzio katuka na Mazulu . . .” Beno lendaka sala yawu, kilumbu mosi, kukondwa kuzaba luswaswanu mosi ve. Bantu yina salaka yawu, na kuzabaka luswaswanu mosi ve, na Actes 19. Kasi yandi tubaka, “Wanzio yina ke longa kima yankaka, bika ti ya vwanda ya kusinga.”

Wapi mutindu beno lenda ndima credo mosi, to mwa isme, kima yankaka, ntangu Biblia ke tuba, “Nsilulu kele samu na beno,” kima mosi yayi, “mbotika ya kieleka ya Mpeve-Santu”?

¹⁵⁹ Wapi mutindu Mpeve-Santu, yina sonikaka Ndinga, kuvwanda na kati ya beno, ke manga Ndinga? Wapi mutindu Yawu lenda manga, ntangu Mpeve-Santu ya kieleka Yawu mosi tubaka, “Kana muntu mosi kubwela ndinga mosi na Yayi, to kukatula kima mosi na Yawu, mu ke katula ndambu ya yandi na Buku ya Luzingu”? Wapi mutindu Mpeve-Santu lenda katula kima mosi na Ndinga, to kubwela kima mosi na Ndinga?

¹⁶⁰ Nkundi ya munu, bawu zole awa mpe na yinza yina ke monikaka ve na meso kisika bande ke kwenda, yina ke monikaka ve na beto ntangu yayi, bika ti yawu kota na kati ya ntima ya beno kubanda na Nsangu ya suka yayi, na kumonaka kisika beto kele. Kana beno me bakaka ntete ve mukanda ya dokotolo yayi yina mu zonzilaka ntama mingi ve, beno ke kuzwa yawu ve? Beto kele awa samu na kusala nyonso yina beto lenda samu na beno, samu na kusadisa beno.

¹⁶¹ Mu kele kaka mumwangisi-nsangu. Mu kele kaka nsodolo. Mutindu beto kele na yawu na Louisville ntangu yayi, na Lukutakanu ya ba-Démocrate ya Kentucky, . . . Ba ke na kutunga estrade samu na bantu ya bawu na kuvwanda ya kusoola. Mu ke na kutunga diaka estrade samu na Mfumu ya munu. Beno zola ve kuyamba Yandi, na nkokila yayi, mutindu ya beno mosi?

¹⁶² Na bayintu ya beto ya kukulumusa, mpe bantima ya beto, mpe, na ntangu yayi, beno zola kaka kutelemisa maboko ya beno mpe kutuba na Nzambi. Ve samu na munu; mu kele kaka muntu. Beno telemisa maboko ya beno na Nzambi, beno tuba, “Nzambi, lemvočila munu. Ya kieleka mu zola bima yayi nionso yina mu me kuwaka. Mu zola kukwenda na ngaanda ya camp. Mu ke kipe ve yina muntu mosi ke tuba.” Nzambi sakumuna nge. Oh, la la, na maboko, na maboko! “Mu zola kukwenda na ngaanda ya camp. Ya lenda vwanda nionso yina ya ke lombwa munu, mu ke baka kulunsi ya munu mpe mu ke nata yawu konso kilumbu. Mu ke

basika na ngaanda ya camp. Ya lenda vwanda nyonso yina bantu ke tuba samu na munu, mu zola kulanda Yandi na ngaanda ya camp. Mu me kubama na kukwenda.”

¹⁶³ Tata ya Mazulu, Nge me mona maboko yango. Ya lendaka vwanda na bantu nkama, to kulutila, na kati ya kivinga, me telemisa maboko ya bawu. Mfumu, ya kele na Kima mosi pene-pene ya bawu ntangu yayi, Muntu yankaka, Muntu ya Klisto, yina ke monikaka ve na meso ya kimuntu, mpe me nata bawu na kubaka lukanu. Na luzingu ya bawu mosi, bawu zaba mutindu bawu ke talaka na kitala-tala, bawu ke mona ti kima mosi ke kondwa. Mpe bawu zola ti baluzingu ya bawu kusalama landila nsilulu ya Nzambi, mpe bawu me telemisa maboko ya bawu na bukieleka ya mudindu. Sadisa bawu, Mfumu, na kyelo ya nene na nkokila yayi, na lupangu ya mameme. Bika ti bawu kwisa na lembami mpe ya kukikulumusa. Pesa yawu. Ba kele ya Nge, Mfumu. Sala na bawu.

¹⁶⁴ Ntangu yayi, ba lendaka ve kubaka lukanu yina, ba lendaka ve kutelemisa diboko ya bawu, kukondwa kima ya kulutila kimpeve. Ya ke lakisa ti ya kele na luzingu kuna kisika mosi. Samu ti, landila science, ngolo ya kubenda ke telemisa maboko ya beto na yisi. Kasi ya vwandaka na kima yina simbaka mabanza ya bawu, yina salaka bawu kutelemina musikulu ya ngolo ya kubenda mpe tulaka maboko ya bawu na ntwala ya Kiyidiki yina nataka bawu. “Yinga, mu zola kwenda tii na nsuka. Mu zola kukwenda na ngaanda ya camp, na nkokila yayi.”

¹⁶⁵ Mfumu, baptistère me kubama samu na kutambula ya ntete na manima ya kubalula ntima, kuna na kuvwandaka ya kubotama, mpe ya kele na nsilulu samu na kuzwa Mpeve-Santu. Na bilumbu yayi ya nsuka, mbokolo na Lukwikilu ya ntete, mukanda ya ntete ya dokotolo! Beto ke mona bantu mingi ntama na Klisto, ke kufwa na yisi ya mikanda ya dokotolo yayi yankaka yina ba me sala na maboko ya bantu. Ya lendaka vwanda mbote mingi na denomination ya bawu, kasi, Mfumu, mu—mu zola mukanda ya dokotolo ya Nge.

Nge kele Dokotolo ya beto. Ya kele na Dokotolo. Ya kele na nkisi na Galaad. Ya kele na Munganga awa, na nkokila yayi, samu na kubelusa konso moyo ya kubela, samu na kubelusa konso nzutu. Dokotolo ya nene ya bantangu nyonso, Kiyidiki ya nene ya mazulu mpe ntoto, kwisa ntangu yayi, Nge zola, na kati ya beto, mpe tuba na beto. Na Nkumbu ya Yesu Klisto.

¹⁶⁶ Na ntangu yina mosi na mosi ke sambila na kati ya ntima ya bawu, “Mfumu Yesu, sadisa munu ntangu yayi!” Mpe kana beno me kuzwaka ntete ve mbotika, mpe beno me ndima . . . Mu me longaka ve na mbotika. Kasi beno me ndimisama ti beno fwana botama na mbotika ya Baklisto, mutindu kaka ti Muklisto nionso . . .

¹⁶⁷ Yinki ke salama kana beno kwisa Kuna, beno botama na mutindu yankaka, mpe Yesu mosi yina tubaka, “Nani ke katula Ndinga mosi, to ke bwela ndinga mosi, ba ke katula yandi kitini ya yandi ya Buku ya Luzingu”? Yesu tubaka yawu. Mpe Yandi tubaka, “Masonuku nionso me twadisama na kimpeve mpe fwana lungisama.” Ntangu yayi beno zaba mutindu yankaka. Yinki beno ke sala samu na yawu?

¹⁶⁸ Kana beno vwandaka kaka na sensation to kima mosi! Mu ke kwikilaka na sensation. Kana beno me kina kaka na Kimpeve, beno me tuba na bandinga ya malu-malu! Mu ke kwikilaka yawu, mpe. Kasi kana ya kele ntama mingi, mpe mpeve ya beno na kati ya beno ke tuba na beno ve na kulanda Ndinga ntangu beno zaba ti Yawu kele kieleka, ya kele na kima ke tambula mbote ve na mpeve yina. Ya kele ve Mpeve-Santu. Ya lenda vwanda ve. Beno me mona, Yawu ke talisa Ndinga ya Yawu Mosi. Beno zaba yawu. Beno lenda kubama na kukwisa ntangu yayi na ntangu yina beto ke sambila.

¹⁶⁹ Yesu ya Nazareth, kwisa pene-pene ntangu yayi mpe tuba na konso ntima. Mu me pesa bawu na Nge. Ti bawu vwanda . . . Maboko nyonso yayi, bawu kele ba-trophée ya Nsangu, Mfumu, na Nge, mpe Mvwandulu ya Nge ya nene ya nana yina kele na beto ntangu yayi. Muntu nyonso yina kele mbote na Mpeve lenda tuba ti Nge kele awa, nsatu yayi ya nene ya busantu. Pesa yawu, Mfumu, kaka ntangu yayi, na Nkumbu ya Yesu Klisto.

Ntangu yayi na bayintu ya beto ya kukulumusa.

¹⁷⁰ Kana ya kele na bantu awa yina ke zola kubotama na Nkumbu ya Yesu Klisto, zola kubalula ntima, zola kusosa mbotika ya Mpeve, ya kele na kivinga ya kuzibuka na diboko ya munu ya kikento; bakento, na diboko ya kibakala. Ya ke vwanda na muntu mosi kuna samu na kupesa beno malongi. Ya kele na bilele ya mbotika ya kukubika, nionso.

¹⁷¹ Ntangu yayi, na yina beto ke kulumusa bayintu ya beto, na kuyimbaka. “Mu lenda kuwa ya munu . . .” Beto ke vwanda na lukutakanu beno. 

64-0719E Kubasika Na Ngaanda Ya Camp
Branham Tabernacle
Jeffersonville, Indiana U.S.A.

KIKONGO-KITUBA

©2025 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutula mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutula mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org